

四庫全書

史部

欽定四庫全書

史部

通志卷一百九十三

詳校官編修_臣李潢

編修_臣裴謙覆勘

覆校官助教_臣金學詩

校對官主事_臣張培

謄錄監生_臣周雲翮

欽定四庫全書

通志卷一百九十三

宋右廸功郎鄭樵漁仲撰

載記卷第八

西涼

李嵩歌

夏

赫連勃勃
昌定

後梁

蕭簪 歸 琮 嶠 巖 岌 岑 璫 蔡大

寶 王操 魏益德 尹正 甄元成 岑善方

宗如周 袁敞

西涼

李暉字元盛小字長生隴西成紀人姓李氏漢前將軍
廣之十六世孫也廣曾祖仲翔漢初為將軍討叛羌于
素昌素昌即狄道也衆寡不敵死之仲翔子伯考奔喪

因葬于狄道之東川遂家焉世為西州右姓高祖雍曾
祖柔仕晉並歷位郡守祖弇仕張軌為武衛將軍安世
亭侯父昶幼有令名早卒遺腹生暵少而好學性沈敏
寬和美器度通涉經史尤善文義及長頗習武藝誦孫
吳兵法嘗與呂光太史令郭麇及其同母弟宋繇同宿
麇起謂繇曰君當位極人臣李君有國土之分家有駟
草馬生白額駒此其時也呂光末京兆段業自稱涼州
牧以敦煌太守趙郡孟敏為沙州刺史署暵效穀令敏

尋卒敦煌護軍馮翊郭謙沙州治中敦煌索仙等以曷
溫毅有惠政推為寧朔將軍敦煌太守曷初難之會宋
繇仕於業告歸敦煌言於曷曰兄忘郭磨之言邪白額
駒今已生矣曷乃從之尋進號冠軍稱藩于業業以曷
為安西將軍敦煌太守領護西胡校尉及業僭稱涼王
其右衛將軍索嗣構曷於業乃以嗣為敦煌太守率騎
五百而西未至二十里移曷使迎已曷驚疑將出迎之
效穀令張邈及宋繇止之曰呂氏政衰段業闇弱正是

英豪有為之日將軍處一國成資柰何束手於人索嗣
自以本邦謂人情附已不虞將軍卒能拒之可一戰而
擒矣宋繇亦曰大丈夫已為世所推今日便授首於嗣
豈不為天下笑乎大兄英姿挺傑有雄霸之風張王之
業不足繼也曷曰吾少無風雲之志因官至此不圖此
郡士人忽爾見推向言出迎者未知士大夫之意故也
因遣繇覘嗣繇見嗣咱以甘言還謂曷曰嗣志驕兵弱
易擒耳於是遣其二子歆讓與邈繇及司馬尹建興等

逆戰破之嗣奔還張掖曷素與嗣善結為刎頸交反為
所構故深恨之乃罪狀嗣於段業業將沮渠男成又惡
嗣亦勸業除之業乃殺嗣遣使謝曷分敦煌之涼興烏
澤晉昌之宜禾三縣為涼興郡進曷持節都督涼興已
西諸軍事鎮西將軍領護西夷校尉時有赤氣起于曷
後園龍跡見于小城隆安四年晉昌太守唐瑤移檄六
郡推曷為大都督大將軍涼州領秦涼二州牧護羌校
尉曷乃赦其境內建年為庚子追尊祖弇曰涼景公父

昶涼簡公以唐瑤為征東將軍郭謙為軍諮祭酒索仙
為左長史張邈為右長史尹建興為左司馬張體順為
右司馬張條為牧府左長史令狐湓為右長史張林為
太府主簿宋繇張謖為從事中郎繇加折衝將軍謖加
揚武將軍索承明為牧府右司馬令狐遷為武衛將軍
晉興太守汜德瑜為寧遠將軍西郡太守張靖為折衝
將軍河湟太守索順為威遠將軍西平太守趙開為驛
馬護軍大夏太守索慈為廣武太守陰亮為西安太守

令狐赫為武威太守索術為武興太守以招懷東夏又遣宋繇東伐涼興并擊玉門已西諸城皆下之遂屯玉門陽闕廣田積穀為東伐之資初呂光之稱王也遣使市六璽玉於于寔至是玉至敦煌納之郡府仍於南門外臨水起堂名曰靖恭之堂以議朝政閱武事圖讚自古聖帝明王忠臣孝子烈士貞女曷親為序頌以明鑒戒之義當時文武羣寮亦皆圖焉有白雀翔于靖恭堂曷觀之大悅又立泮宮增高門學生五百人起嘉納堂

於後園以圖讚所志義熙元年曷改元為建初遣舍人
黃始梁興間行奉表詣建康稱藩求稟正朔曷謂羣僚
曰昔河右分崩羣豪競起吾以寡德為衆賢所推何嘗
不忘寢與食思濟黎庶故前遣母弟繇董率雲騎東殄
不庭軍之所至莫不賓下今惟蒙遜鷄時一城自張掖
已東晉之遺黎雖為戎虜所制至於向義思風過於殷
人之望西伯大業須定不可安寢吾將遷都酒泉漸逼
寇穴諸君以為何如張遜贊成其議曷大悅曰二人同

心其利斷金張長史與孤同矣夫復何疑乃以張體順為寧遠將軍建康太守鎮樂涇徵宋繇為右將軍領敦煌護軍與其子敦煌太守讓鎮敦煌遂遷居于酒泉初暁之西也留女敬愛養於外祖尹文文既東遷暁從姑梁褒之母養之其後禿髮傉檀假道於北山鮮卑遣褒送敬愛于酒泉并通和好暁遣使報聘贈以方物暁親率騎二萬略地至于建東鄯善前部王遣使貢其方物沮渠蒙遜來侵至于建康掠三千餘戶而歸暁大怒率

騎追之及于彌安大敗之盡收所略之戶初苻堅建元之末徙江漢之人萬餘戶于敦煌中州之人有田疇不開者亦徙七千餘戶郭麇之寇武威武威張掖已東人西奔敦煌晉昌者數千戶及曷東遷皆徙之于酒泉分南人五千戶置會稽郡中州人五千戶置廣夏郡餘萬三千戶分置武威武興張掖三郡築城於敦煌南子亭以威南虜又以前表未報復遣沙門法泉間行奉表建康願竭誠盡節為國輸力曷既遷酒泉乃敦勸稼穡羣

寮以年穀頻登百姓樂業請勒銘酒泉曷許之於是使
儒林祭酒劉彥明為文刻石頌德既而蒙遜每年侵寇
不止曷志在以德撫其境內但與通和立盟弗之校也
是時白狼白兔白雀白雉白鳩皆棲其園囿其羣下以
為白祥金精所誕皆應時邕而至又有神光甘露連理
嘉禾衆瑞請史官記其事曷從之尋而蒙遜背盟來侵
曷遣世子歆要擊敗之獲其將沮渠百年曷乃修敦煌
舊塞東西二圍以防北虜之患築敦煌舊塞西南二圍

以威南虜曷以緯世之量當呂氏之末為羣雄所奉遂
啓霸圖兵無血刃坐定千里謂張氏之業指期可成河
西十郡歲月而一既而禿髮傳檀入據姑臧沮渠蒙遜
基宇稍廣於是慨然著述志賦以自見詞多不載曷寢
疾頽命宋繇曰吾少離荼毒百艱備嘗於喪亂之際遂
為此方所推才弱智淺不能一同河右今氣力假然當
不復起矣死者大理吾不悲之所恨志不申耳居元首
之位者宜深誠危殆之機吾終之後世子猶卿子也善

相輔導述吾平生勿令居人之上專驕自任軍國之宜委之於卿無使籌略乖衷失成敗之要十三年死時年六十七國人上謚曰武昭王墓曰建世陵廟號太祖曷世子譚早卒第二子歆嗣

歆字士業曷死時府寮奉為大都督大將軍涼公領涼州牧護羌校尉大赦境內改年為嘉興尊母尹氏為太后以宋繇為武衛將軍廣夏太守軍諮祭酒錄三府事索仙為征虜將軍張掖太守沮渠蒙遜遣其張掖太守

沮渠廣宗詐降誘歆歆遣武衛溫宜等赴之親勒大軍
為之後繼蒙遜率衆三萬設伏于蓼泉歆聞引兵還為
蒙遜所逼歆親貫甲先登大敗之追奔百餘里俘斬七
千餘級明年蒙遜又伐歆歆將出距之左長史張體順
固諫乃止蒙遜大芟秋稼而還是歲朝廷以歆為持節
都督七郡諸軍事鎮西大將軍護羌校尉酒泉公歆用
刑頗嚴又繕築不止從事中郎張顯上疏諫曰入歲已
來陰陽失序屢有賊風暴雨犯傷和氣今區域三分勢

不久並并兼之本實在農戰懷遠之略事歸寬簡而更繁刑峻法宮室是務人力凋殘百姓悲悴致災之咎實此之由主簿汜稱又上疏諫曰臣聞天之子愛人后殷勤至矣故政之不修則垂災譴以誠之改者雖危必昌宋景是也其不改者雖安必亡號公是也元年三月癸卯敦煌謙德堂陷八月效穀地裂二年元日昏霧四塞四月日赤無光二旬乃復十一月狐上南門今茲春夏地頻五震六月隕星于建康臣雖學不稽古敏謝仲舒

頗亦聞道於先師且行年五十有九請為殿下略言耳目之所聞見不復能遠論書傳之事也乃者咸安之初西平地裂狐入謙光殿前俄而秦師奄至都城不守梁熙既為涼州藉秦氏兵亂規有全涼之地外不撫百姓內多聚斂建元十九年姑臧南門崩隕石於閑豫堂二十年而呂光東反子敗於前身戮於後段業因羣胡創亂遂稱制此方三年之中地震五十餘所既而先王龍興瓜州蒙遜敗之張掖此皆目前之成事亦殿下之所

聞知效穀先王鴻漸之始謙德即尊之室基陷地裂大
凶之徵也日者太陽之精中國之象赤而無光中國將
為胡夷之所陵滅諺曰野獸入家主人將去今狐上南
門亦災之大也又狐者胡也天意若曰將有胡人居于
此城南面而居者也昔春秋之世星隕于宋襄公卒為
楚所擒地者至陰胡夷之象當靜而動反亂天常天意
若曰胡夷將震動中國中國若不修德將有宋襄之禍
臣願殿下親仁善鄰養威觀釁罷宮室之務止游畋之

娛後宮嬪妃諸弟子女躬受分田身勸蠶績以清儉素
德為榮息茲奢靡之費庶可以弭災止變不然將恐宗
廟之危必不出紀歆並不納歆立四年而宋受禪歆將
謀東伐張體順切諫乃止歆聞蒙遜南伐禿髮傉檀命
中外戒嚴將攻張掖尹氏固諫不聽宋繇又固諫歆並
不從繇退而歎曰大事去矣吾見師之出不見師之還
也歆遂率步騎三萬東伐次于都瀆澗蒙遜自浩疊來
距戰于懷城為蒙遜所敗左右勸歆還酒泉歆曰吾違

太后明誨遠取敗辱不殺此胡復何面目以見母也勒
衆復戰敗于蓼泉為蒙遜所害歆諸弟酒泉太守翻新
城太守預領羽林右監密左將軍眺右將軍亮等西奔
敦煌蒙遜遂入于酒泉歆之未敗也有大蛇從南門而
入至于恭德殿前有雙雉飛出宮內通街大樹上有烏
鵲爭巢鵲為烏所殺又有敦煌父老令狐熾夢白頭公
衣恰而謂熾曰南風動吹長木胡桐椎不中轂言訖忽
然不見歆小字桐椎至是而亡翻及弟敦煌太守恂與

諸子等棄敦煌奔于北山蒙遜以索嗣子元緒行敦煌
太守元緒麤嶮好殺大失人和郡人宋承張弘以恂在
郡有惠政密信招恂恂率數十騎入于敦煌元緒東奔
涼興宋承等推恂為冠軍將軍涼州刺史蒙遜遣世子
德政率衆攻恂恂閉門不戰蒙遜自率衆二萬攻之三
面起堤以水灌城恂遣壯士一千連版為橋潛欲決堤
蒙遜勒兵逆戰屠其城歆子重耳脫身奔于江左仕于
宋後歸魏為恒農太守蒙遜徙翻子寶等于姑臧歲餘

北奔伊吾後歸于魏獨尹氏及諸女死於伊吾
高祖以安帝隆安四年僭立至宋高祖永初二年滅凡二十二年
二世三主

夏

赫連勃勃字屈丐匈奴右賢王去卑之後而劉淵之族
也曾祖虎劉聰世以宗室封樓煩公拜安北將軍監鮮
卑諸軍事丁零中郎將雄據肆廬川為代王猗廬所敗
遂出塞表祖豹子招集種落復為諸部之雄石虎遣使

就拜為平北將軍左賢王丁零單于父衛辰入居塞內
苻堅以為西單于督攝河西諸虜屯于代來城及堅國
亂遂有朔方之地控弦之士三萬八千後魏師伐之衛
辰令其子力侯提距戰為魏所敗魏人乘勝濟河克代
來執衛辰殺之勃勃乃奔于叱干部叱于他斗伏送勃
勃於魏他斗伏兄子阿利先成大洛川聞將送勃勃馳
諫曰烏崔投人尚宜濟免况勃勃國破家亡歸命於我
縱不能容猶宜任其所奔今執而送之深非仁者之舉

他斗伏懼為魏所責弗從阿利潛遣勁勇篡勃勃於路
送於姚興高平公沒奕于奕于以女妻之勃勃身長八
尺五寸腰帶十圍性辯慧美風儀興見而奇之深加禮
敬拜駘騎將軍加奉車都尉常參軍國大議寵遇踰於
勲舊興弟邕言於興曰勃勃天性不仁難以親近陛下
寵遇太甚臣竊惑之興曰勃勃有濟世之才吾方收其
藝用與之共平天下有何不可乃以勃勃為安遠將軍
封陽川侯使助沒奕于鎮高平以三城朔方雜夷及衛

辰部衆三萬配之使為伐魏偵候姚邕固諫以為不可
興曰卿何以知其性氣邕曰勃勃奉上慢御衆殘貪暴
無親輕為去就寵之踰分終為邊害興乃止頃之以勃
勃為持節安北將軍五原公配以三交五部鮮卑及雜
虜二萬餘落鎮朔方時河西鮮卑杜崱獻馬八千匹于
姚興濟河至大城勃勃留之召其衆三萬餘人偽獵高
平川襲殺沒奕于而并其衆衆至數萬義熙二年僭稱
天王大單于赦其境內建元曰龍昇署置百官自以句

奴夏后氏之苗裔也國稱大夏以其長兄右地代為丞相代公次兄力俟提為大將軍魏公叱干阿利為御史大夫梁公弟阿利羅引為征南將軍司隸校尉若門為尚書令叱以韃為征西將軍尚書左僕射乙斗為征北將軍尚書右僕射自餘以次授任其年討鮮卑薛于等三部破之降衆萬數千進討姚興三城已北諸戍斬其將楊丕姚石生等諸將諫以固險不從又復言於勃勃曰陛下將欲經營宇內南取長安宜先固根本使人心

有所憑繫然後大業可成高平險固山川沃饒可以都也勃勃曰卿徒知其一未知其二吾大業草創衆旅未多姚興亦一時之雄關中未可圖也且其諸鎮用命我若專固一城彼必并力於我衆非其敵亡可立待吾以雲騎風馳出其不意救前則擊其後救後則擊其前使彼疲於奔命我則游食自若不及十年嶺北河東盡我有也待姚興死後徐取長安姚泓凡弱小兒擒之方略已在吾計中矣昔軒轅氏亦遷居無常二十餘年豈獨

我乎於是侵掠嶺北嶺北諸城門不晝啓興歎曰吾不用黃兒之言以至於此黃兒姚邕小字也勃勃初僭號求婚於秃髮傉檀傉檀弗許勃勃怒率騎二萬伐之自楊非至于支楊三百餘里殺傷萬餘人驅掠二萬七千口牛馬羊數十萬而還傉檀率衆追之其將焦朗謂傉檀曰勃勃天姿雄鷲御軍齊肅未可輕也今因抄掠之資率思歸之士人自為戰難與爭鋒不如從溫圍北渡趣萬斛堆阻水結營制其咽喉百戰百勝之術也傉檀

將賀連怒曰勃勃以死亡之餘率烏合之衆犯順結禍
幸有大功今牛羊塞路財寶若山窘弊之餘人懷貪競
不能督厲士衆以抗我也我以大軍臨之必土崩魚潰
今引軍避之示敵以弱我衆氣銳宜在速追傳檀曰吾
追計決矣敢諫者斬勃勃聞而大喜乃於陽武下陝鑿
凌埋車以塞路傳檀遣善射者射之中勃勃左臂勃勃
乃勒衆逆擊大敗之追奔八十餘里殺傷萬計斬其大
將十餘人以為京觀號髑髏臺還于嶺北勃勃與姚興

將張佛生戰于青石原又敗之俘斬五千七百人興遣
將齊難率衆二萬來伐勃勃退如河曲難以去勃勃既
遠縱兵掠野勃勃潛軍覆之俘獲七千餘人收其戎馬
兵杖難引軍而退勃勃復追擊于木城拔之擒難俘其
將士萬有三十戎馬萬匹嶺北夷夏降附者數萬計勃
勃於是拜置守宰以撫之勃勃又率騎二萬入高岡及
于五井掠平涼雜胡七千餘戶以配後軍進屯依力川
姚興來伐至三城勃勃侯興諸軍未集率騎擊之興大

懼遣其將姚文宗距戰勃勃偽退設伏以待之興遣其將姚掄生等追之伏兵夾擊皆擒之興將王奚聚羌胡三千餘戶于勅奇堡勃勃進攻之奚驍悍有膂力短兵接戰勃勃之衆多為所傷於是堰斷其水堡人窘迫執奚出降勃勃謂奚曰卿忠臣也朕方與卿共平天下奚曰若蒙大恩速死為意乃與所親數十人自刎而死勃勃又攻興將金洛生于黃石固彌姐豪地于我羅城皆拔之徙七千餘家於大城以其丞相右地代領幽州牧

以鎮之遣其尚書金纂率騎一萬攻平涼姚興來救纂為興所敗死之勃勃兄子左將軍羅提率步騎一萬攻興將姚廣都于定陽克之坑將士四千餘人以女弱為軍賞拜廣都為太常勃勃又攻興將姚壽都于清水城壽都奔上邽徙其人萬六千家于大城是歲齊難姚廣都謀叛皆誅之姚興將姚詳棄三城南奔大蘇勃勃遣其將平東鹿奕于要擊之執詳盡俘其眾詳至勃勃數而斬之其年勃勃率騎三萬攻安定與姚興將楊佛嵩

戰于青石北原敗之降其衆四萬五千獲戎馬二萬匹
進攻姚興將党智隆于東鄉降之署智隆光祿勳徙其
三千餘戶于貳城姚興鎮北參軍王買德來奔勃勃謂
買德曰朕大禹之後世居幽朔祖宗重暉常與漢魏為
敵國中世不競受制於人逮朕不肖不能紹隆先構國
破家亡流離漂虜今將應運而興復大禹之業卿以為
何如買德曰自皇晉失統神器南移羣雄岳峙人懷問
鼎况陛下奕葉載德重光朔野神武超於漢皇聖略邁

於魏祖而不於天啓之機建成大業乎今秦政雖衰藩
鎮猶固深願蓄力待時詳而後舉勃勃善之拜為軍師
中郎將乃赦其境內改元為鳳翔以叱干阿利領將作
大匠發嶺北夷夏十萬人於朔方水北黑水之南營起
都城勃勃自言朕方統一天下君臨萬邦可以統萬為
都城名阿利性尤工巧然殘忍刻暴乃蒸土築城錐入
一寸即殺作者而并築之勃勃以為忠故委以營繕之
任又造五兵之器精銳尤甚既成呈之工匠必有死者

射甲不入即斬弓人如其入也便斬鎧匠又造百鍊剛
刀為龍雀大環號曰大夏龍雀銘其背曰古之利器吳
楚湛盧大夏龍雀名冠神都可以懷遠可以柔邇如風
靡草威服九區世甚珍之復鑄銅為大鼓飛廉翁仲銅
駝龍虎之屬皆以黃金飾之列於宮殿之前凡殺工匠
數千以是器物莫不精麗於是議討乞伏熾磐王買德
諫曰明王之行師也軌物以德不以暴且熾磐我之與
國新遭大喪今若伐之豈所謂乘理而動上感靈和之

義乎苟恃衆力因人喪難匹夫猶恥為之而況萬乘哉
勃勃曰甚善微卿朕安聞此言其年下書曰朕之皇祖
自北遷幽朔姓改如氏音殊中國故從母氏為劉子而
從母之姓非禮也古人氏族無常或以因生為氏或以
王父之名朕將以義易之帝王者係天為子是為徽赫
實與天連今改姓曰赫連氏庶協皇天之意永享無彊
大慶係天之尊不可令支庶同之其非正統皆以鐵伐
為氏庶朕宗族子孫剛銳如鐵皆堪伐人立其妻梁氏

為王后子瓚為太子封子延為陽平公昌太原公倫酒
泉公定平原公滿河南公安中山公又攻姚興將姚達
于杏城二旬克之執達及其將姚大用姚安和姚利僕
尹敵等坑戰士二萬人遣其御史中丞烏洛孤盟於沮
渠蒙遜以結和好蒙遜遣其將沮渠漢平報之勃勃聞
姚泓將姚嵩與氏王楊盛相持率騎四萬襲上邽未至
而嵩為盛所殺勃勃攻上邽二旬克之殺泓秦州刺史
姚平都及將士五千人毀城而去進攻陰密又殺興將

姚良子及將士萬餘人以其子昌為使持節前將軍雍州刺史鎮陰密泓將姚恢棄安定奔于長安安定人胡儼華韜率戶五萬據安定降于勃勃以儼為侍中韜為尚書留鎮東羊苟兒鎮之配以鮮卑五千進攻泓將姚謏于雍城謏奔長安勃勃進師次郿城泓遣其將姚紹來距勃勃退如安定胡儼等嚴殺苟兒以城降泓勃勃引歸杏城笑謂羣臣曰劉裕伐秦水陸兼進且裕有高世之略姚泓豈能自固吾驗以天時人事必當克之又

其兄弟內叛安可以距人裕既克長安利在速返正可
留子弟及諸將守關中待裕發軫吾取之若拾芥耳不
足復勞吾士馬於是秣馬厲兵休養士卒尋進據安定
姚泓嶺北鎮戍郡縣悉降勃勃於是盡有嶺北之地俄
而劉裕滅泓入于長安遣使遺勃勃書請通和好約為
兄弟勃勃命其中書侍郎皇甫徽為文而陰誦之召裕
使前口授舍人為書封以答裕裕覽其文而奇之使者
又言勃勃容儀瓌偉英武絕人裕歎曰吾所不如也既

而勃勃還統萬裕留子義真鎮長安而還勃勃聞之大
悅謂王買德曰朕將進圖長安卿試言取之方略買德
曰劉裕滅秦所謂以亂平亂未有德政以濟蒼生闕中
形勝之地而以弱才小兒守之非經遠之規也狼狽而
返者欲速成篡事耳無暇有意於中原陛下以順伐逆
義貫幽顯百姓以君命望陛下義旗之至以日為歲矣
青泥上洛南師之衝要宜置遊兵斷其去來之路然後
杜潼關塞峭陝絕其水陸之道陛下聲檄長安申布恩

澤三輔父老皆壺漿以迎王師矣義真獨坐空城逃竄
無所一旬之間必面縛麾下所謂兵不血刃不戰而自
定也勃勃善之以子璜都督前鋒諸軍事領撫軍大將
軍率騎二萬南伐長安前將軍赫連昌屯兵潼關以買
德為撫軍右長史南斷青泥勃勃率大軍繼發璜至渭
陽降者屬路義真遣龍驤將軍沈田子率衆逆戰不利
而退屯劉迴堡田子與義真司馬王鎮惡不平因鎮惡
出城遂殺之義真又殺田子於是悉召外軍入于城中

閉門距守關中郡縣悉降璜夜嚴長安不克勃勃進據
咸陽長安樵採路絕劉裕聞之大懼乃召義真東鎮洛
陽以朱齡石為雍州刺史守長安義真大掠而東至於
灞上百姓遂逐齡石而迎勃勃入于長安璜率衆三萬
追擊義真王師敗績義真單馬而遁買德獲晉寧朔將
軍傅弘之輔國將軍蒯恩義真司馬毛修之於青泥積
人頭以為京觀於是勃勃大饗將士于長安舉觴謂王
買德曰卿往日之言一周而果效可謂算無遺策矣雖

宗廟社稷之靈亦卿謀猷之力也此觴所集非卿而誰
於是拜買德都官尚書加冠軍將軍封河陽侯赫連昌
攻齡石及龍驤將軍王敬於潼關之曹公故壘克之執
齡石及敬送于長安羣臣乃勸進勃勃曰朕無撥亂之
才不能弘濟兆庶自枕戈寢甲十有二年而四海未同
遺寇尚熾不知何以謝責當年垂之來葉將明揚仄陋
以王位讓之然後歸老朔方琴書卒歲皇帝之號豈薄
德所膺羣臣固請乃許之於是為壇於灊上僭即皇帝

位赦其境內改元為昌武遣其將叱奴侯提率步騎二萬攻晉并州刺史毛德祖于蒲坂德祖奔于洛陽以侯提為并州刺史鎮蒲坂勃勃歸于長安徵隱士京兆韋祖思既至而恭懼過禮勃勃怒曰吾以國士徵汝奈何以非類處吾汝昔不拜姚興何獨拜我我今未死汝猶不以我為帝王吾死之後汝輩弄筆當置吾何地遂殺之羣臣勸都長安勃勃曰朕豈不知長安累帝舊都有山河四塞之固但荆吳僻遠勢不能為人之患東魏與

我同壤境去北京裁數百餘里若都長安北京恐有不
守之憂朕在統萬彼終不敢濟河諸卿適未見此耳其
下咸曰非所及也乃於長安置南臺以瑣領大將軍雍
州牧錄南臺尚書事勃勃還統萬以宮殿大成於是赦
其境內又改元曰真興時元嘉元年也因刻石都南命
其秘書監胡義周撰辭頌美功德名其南門曰朝宋門
東門曰招魏門西門曰服涼門北門曰平朔門追尊其
高祖訓兒曰元皇帝曾祖武曰景皇帝祖豹子曰宣皇

帝父衛辰曰桓皇帝廟號太祖母苻氏曰桓文皇后勃
勃將廢太子瑣而立少子酒泉公倫瑣知之是歲以兵
攻倫倫拒之敗死倫兄太原公昌襲瑣殺之并其衆歸
于統萬勃勃大悅立昌為太子勃勃性凶暴好殺無順
守之規常居城上置弓劍於側有所嫌忿便手自殺之
羣臣忤視者毀其目笑者決其脣諫者謂之誹謗先截
其舌而後斬之夷夏囂然人無生賴勃勃僭立十四年
而宋氏受禪以宋元嘉二年八月死偽諡武烈皇帝廟

號世祖陵曰嘉平

昌字還國一名折勃勃之第二子也始封太原公授雍州刺史鎮陰密以罷殺太子瑱得為嗣既僭立改年承元魏太武聞勃勃死關中亂遂遣司空奚斤罷蒲坂中兵將軍周幾罷陝自將罷統萬行至君子津會天暴雨水合率輕騎一萬八千濟河罷昌方燕羣臣聞魏師奄至上下驚擾太武次於黑水去城三十餘里昌出戰太武馳往擊之昌退走入城門未及閉魏將豆代田乘勝

帥衆入其西宮焚其西門宮門閉代田踰垣而出明日
魏分軍四掠殺獲數萬太武謂諸將曰統萬未可得也
他年當與卿等取之乃徙其民萬餘家而還昌遣其弟
平原公定與奚斤相持於長安元嘉四年五月太武復
西伐至拔鄰山築城捨輜重以輕騎三萬倍道先行羣
臣咸諫曰統萬城堅非一日可拔今輕軍討之進不可
克退無所資不若步軍攻具一時俱往太武曰夫用兵
之術攻城最下必不得已然後用之今以步兵攻具皆

進彼必懼而堅守若攻不時拔食盡兵疲外無所掠非計之得也不如以輕騎直抵其城彼見步兵未至意必寬弛吾羸形以誘之若得一戰則成禽矣吾軍去家二千餘里復有黃河之難所謂置之死地而後生也以是決戰則有餘攻城則不足遂行次于黑水分軍伏於夾谷而以少衆至其城下昌將狄子玉來降言昌聞有魏師追其弟定定曰統萬城堅未易攻拔待我禽奚斤然後徐往內外擊之蔑不濟矣故昌堅守以待之太武患

之乃退軍城北示昌以弱遣永昌王健及宗正蛾清等分騎五千西掠居人會軍士負罪亡入昌城言魏軍糧盡士卒食菜輜重在後步兵未至擊之為便昌信其言引衆出城步騎三萬司徒長孫翰等咸言昌步騎難犯宜避其鋒太武曰遠來求賊唯恐不出今避而不擊彼奮我弱非計也遂收衆偽北引而疲之昌以為退鼓譟而前舒陣為翼行五六里太武衝之昌陣不動稍前行會有風雨從東南來揚沙晦冥宦者趙倪曰今風雨從

賊上來我向彼背天不助人願攝陣避之太常崔浩叱之曰是何言也吾千里制勝一日之中豈得變易賊貪進不已後軍已絕宜隱軍分出奄擊不意風道在人豈有常也太武善之乃分騎為左右隊以倚之太武馬蹶而墜幾為昌兵所獲宗室拓跋齊以身捍蔽太武騰馬得上身中流矢奮擊不輟昌衆大潰魏師乘勝逐昌至城北昌遂奔上邽太武微服逐奔者入其城城中人覺之諸門悉閉太武與拓跋齊等入其宮中得裙繫之槩

上乘之而上僅乃得免明日入城獲昌王公卿校及婦女以萬數馬三千匹牛羊數千萬頭府庫珍寶車旗器物不可勝計初勃勃性豪侈築統萬城高十仞基厚三十步上廣十步宮牆高五仞其堅可以厲刀斧臺榭壯大皆雕鏤圖畫被以繡綺太武曰最爾國而用民如此欲不亡得乎奚斤追昌至雍不及而還赫連定聞統萬破亦奔昌於上邽太武還平城以常山王素鎮統萬留太僕邱堆與娥清使助奚斤擊昌五年太武復使將軍

尉建攻上邽昌退屯平涼奚斤進軍安定與邱堆娥清
軍合斤以馬疲糧少深壘自固遣堆行督租為昌所罷
堆敗還城昌乘勝日夜鈔掠不得芻牧諸將患之監軍
侍御史安頡請斤決戰斤以馬少為辭頡曰昌狷而無
謀好勇而輕每自出挑戰衆皆識之今斂諸將所乘馬
可得二百匹頡請募死士擊之昌可禽也斤猶難之頡
乃陰與尉建選騎以待既而昌果來攻城頡出應之昌
自出搏戰軍士爭赴之昌敗走頡追禽之太武使侍中

古弼迎昌至平城舍之西宮門內給以乘輿之副又以妹始平公主妻之假昌常忠將軍賜爵會稽公又封為秦王後以元嘉十一年叛魏西走為侯將格殺之魏人并誅其羣弟

定小字直犢勃勃之第五子也始封平原公昌立進爵為王定凶暴無賴昌之被禽也定收其餘衆奔還平涼僭即偽位改年勝光奚斤以昌為偏裨所禽深恥之乃捨輜重齎三日糧追定於平涼娥清欲循水而往斤不

從自北道邀其走路定軍將遁會魏小將有罪亡歸定
告以魏軍食少無水定乃分兵夾擊之魏兵大潰斤清
皆為所禽邱堆棄輜重奔還於是定復取長安定嘗登
陰槃山望其本國泣曰先帝以朕承大業者豈有今日
之事乎使天假朕年當與卿諸人建李興之業俄而羣
狐百數鳴於其側定命射之無所獲惡之曰所見亦大
不臧咄咄天道復何言哉定遣使求和於宋約合兵滅
魏遙分河北自恒山以東屬宋以西屬夏元嘉七年魏

太武自罷平涼使將軍古弼等將兵趣安定定自安定北救平涼與弼遇弼偽退以誘之定追之太武使高車馳擊之定大敗走鶻觚原魏軍圍之斷其水草人馬饑渴定引衆下原魏軍擊之定衆大潰定中重創單騎走收餘衆西保上邽魏兵遂取安定太武還臨平涼克之復取長安八年定遣其叔父韋伐攻秦主乞伏慕末於南安以慕末歸殺之是歲定畏魏人之逼擁秦民十餘萬口自治城濟河欲擊北涼王沮渠蒙遜而奪其地吐

谷渾王慕瓚遣騎三萬乘其半濟邀擊之執定以歸明年吐谷渾送定于魏魏人殺之始勃勃以晉安帝義熙三年僭號至定二世三主凡二十有五年而滅

後梁

蕭詧字理孫蘭陵人梁武帝之孫昭明太子統之第三子也幼好學善屬文尤長佛義特為武帝嘉賞梁普通中封曲江縣公及昭明太子薨封詧岳陽郡王位東揚州刺史領會稽太守初昭明卒武帝捨詧兄弟而立簡

文內常愧之故罷亞諸子以會稽人物殷阜一都之會故有此授以慰其心譽既以其昆季不得為嗣常懷不平又以武帝衰老朝多秕政有敗亡之漸遂蓄聚財貨交通賓客招募輕俠折節下之其勇敢者多歸附焉左右遂至數千人皆厚加資給大同元年除西中郎將雍州刺史都督五州諸軍事寧蠻校尉譽以襄陽形勝之地又武帝創基之所時平足以樹根本時亂足以圖霸功遂務修刑政太清二年武帝以譽兄河東王譽為湘

州刺史徙湘州刺史張纘為雍州纘恃才輕譽州府迎
候有闕譽深銜之遂託疾不與相見後聞侯景作亂頗
陵蹙纘纘構譽及譽於梁元帝元帝令其世子方等及
王僧辯相繼攻譽譽告急於譽譽聞之大怒及元帝將
援建業令所部諸州並發兵赴都譽遣府司馬劉方貴
領兵為前軍出漢口及將發元帝又使詔議參軍劉杲
召譽自行譽不從而方貴潛與元帝相知剋期罷譽未
及發會譽以他事召方貴方貴懼謀泄遂據樊城拒命

磐遣軍攻之元帝乃厚資遣張纘若將述職而密援方貴纘次大隄而樊城已陷磐禽方貴兄弟黨與並斬之磐時以譽危急乃留諮議參軍蔡大寶守襄陽率衆伐江陵以救之元帝大懼乃遣參軍庾奩謂磐曰以姪伐叔逆順安在磐曰家兄無辜屢被攻圍七父若顧先恩豈應若是如能退兵湘水吾便旋旆襄陽時攻柵不剋會大雨暴至平地四尺衆頗離心軍主杜岸岸弟幼安及其兄子龕以其屬降於江陵磐乃遁歸襄陽器械輜

重多沒於健水。咎恐不能自固，乃遣蔡大寶求附庸于西魏。時西魏大統十五年也。西魏丞相宇文泰令其東閣祭酒榮權使焉。是歲元帝令柳仲禮圍襄陽。咎乃遣妃王氏及世子嶠為質，請救宇文泰。令榮權報命。仍遣開府楊忠為援。十六年，忠禽仲禮于漢東。西魏命咎發喪嗣位。咎辭，乃使假散騎常侍鄭孝穆及榮權策命。咎為梁王。乃於襄陽置百官，承制封拜。十七年，留尚書僕射蔡大寶守雍部，而朝于長安。宇文泰謂曰：「王之來此。」

頗由榮權乃召權見詔泰曰權吉士也寡人與之從事
未嘗見失信詔曰榮權常道二國之言無私故詔今者
得歸誠魏闕耳魏恭帝元年宇文泰命柱國于謹伐江
陵詔以兵會之及江陵平泰命詔主梁嗣居江陵東城
資以江陵一州之地其襄陽所統盡入於魏詔乃稱皇
帝於其國年號大定追尊其父統為昭明皇帝廟號高
宗統妃蔡氏為昭德皇后又尊其所生母龔氏為皇太
后立妻王氏為皇后子歸為皇太子其慶賞刑威官方

制度並同王者唯上疏則稱臣奉魏正朔至於爵命其
下亦依梁氏之舊其戎章勲級則又兼用柱國等官又
追贈叔父邵陵王綸太宰諡曰壯武贈兄河東王譽丞
相諡曰武桓宇文泰仍置江陵防主統兵居於西城名
曰武植泰外云助弩備禦內實防弩初江陵滅元帝將
王琳據湘州志圖匡復及弩立琳乃遣其將潘純陀侯
方兒來寇弩禦之純陀等退歸夏口弩之四年弩遣其
大將軍王操略取王琳之長沙武陵南平等郡五年王

琳又遣其將雷文柔襲陷監利郡太守大有死之尋而琳與陳人相持稱蕃乞師於咎咎許之師未出而琳軍敗附於齊是歲其太子歸朝于長安六年四月大雨震其前殿崩壓三百餘人七年冬有鵬鳥鳴于寢殿八年二月咎終于前殿時年四十四是歲周保定二年也八月葬于平陵謚曰宣皇帝廟號中宗咎少有大志不拘小節雖多猜忌而知人善任使撫將士有恩能得其死力性不飲酒安於儉素事母以孝聞又不好聲色尤惡

見婦人雖相去數步亦云遙聞其臭經御婦人之衣更不再著並皆棄之一幸姬媵病卧累旬又惡見人髮白事之者必方便避之擔輿者冬月必須裹頭夏月則加蓮葉帽其在東揚州頗放誕省覽簿領好為戲弄之言以此獲譏於世及江陵平宿將尹德毅謂答曰臣聞人主之行與匹夫不同匹夫者飾小行競小廉以取名譽人主者定天下安社稷以成大功今魏虜貪憚罔顧弔伐之義俘囚士庶並充軍實然此等戚屬咸在江東悠

悠之人可門到戶說既塗炭至此咸謂殿下為之殿下
既殺人父兄孤人子弟人盡讎也又誰與為國但魏之
精銳盡萃於此犒師之禮非無故事若殿下為設享會
固請于謹等為歡彼無我虞當相率而至預伏武士因
而斃之撫江陵百姓而安之文武官僚隨材銓授魏人
懾息未敢送死僧辯之徒折簡可致然後朝服濟江入
踐皇極纘堯復禹萬世一時咎謂德毅曰卿此策非不
善也然魏人待我甚厚未可背德若遽為卿計則鄧祁

侯所謂人將不食吾餘既而闔城長幼被虜入關又失襄陽之地咎恨乃曰不用德毅之言以至於此又見邑居殘毀干戈日用恥其威略不振常懷憂憤乃著愍時賦以見志焉居常怏怏每誦老馬伏櫪志在千里烈士暮年壯心不已未嘗不盱衡抱歎吒者久之遂以憂憤發背而死咎薦好文義所著文集十五卷內典華嚴般若法華金光明義疏三十六卷並行於世周武帝又命其太子歸嗣位年號天保

歸字仁遠，謚之第三子也。機辯有文學，善於撫御，能得其下之歡心。嗣位之元年，尊其祖母龔太后曰太皇太后，嫡母王皇后曰皇太后。所生曹貴嬪曰皇太妃。其年五月，太皇太后薨，謚曰元太后。九月，太妃又薨，謚曰孝皇太妃。二年，其皇太后薨，謚曰宣靜皇后。五年，陳湘州刺史華皎、巴州刺史戴僧朔並來附，皎送其子元響為質於歸，仍請兵伐陳。歸上言其狀，周武詔衛公直督荊州，總管權景宣大將軍元定等赴之。歸亦遣其柱國王

操率水軍二萬會皎於巴陵既而與陳將吳明徹等戰於沌口直軍不利元定遂沒歸大將軍李廣等亦為陳人所虜長沙巴陵並陷於陳衛公直乃歸臯於歸之柱國殷亮歸雖以退敗不獨臯亮然不敢違命遂誅之吳明徹乘勝攻克歸河東郡獲其守將許孝敬明年明徹進寇江陵引江水灌城歸出頓紀南以避其銳江陵副總管高琳與其尚書僕射王操拒守歸馬軍主馬武吉徹等擊明徹明徹退保公安歸乃還江陵歸之八年陳

又遣其司空章昭達來寇江陵總管陸騰及歸之將士擊走之昭達又寇竟陵之青泥歸令其大將軍許世武赴援大為昭達所破初華皎戴僧朔從衛公直與陳人戰率其麾下數百人歸於歸歸以皎為司空封江夏郡公僧朔為車騎將軍封吳興縣侯歸之十年皎將來朝至襄陽請衛公直曰梁主既臣江南諸人少國貧朝廷興亡繼絕理宜資贍豈使齊桓楚莊獨擅救衛復陳之美望借數州以裨梁國直然之乃遣使言狀于周武

帝許之詔以基平都三州歸之於歸及周平齊歸朝於
鄴帝雖以禮接之然未之重也歸知之後因宴承間乃
陳其父荷文帝拯救之恩并叙二國艱虞脣齒掎角之
事辭理辨暢因泣涕交流帝亦為之歔歔自是大加賞
異禮遇日隆後帝復與之宴齊氏故臣叱列長叉亦預
焉帝指謂歸曰是登陴罵朕者也歸曰長叉未能輔桀
翻敢吠堯帝大笑及酒酣帝又命琵琶自彈之仍謂歸
曰當為梁王盡歡歸乃起請舞帝曰王乃能為朕舞乎

歸曰陛下既親撫五絃臣何敢不同百獸帝大悅賜雜
繒萬段良馬數十匹并賜齊後主妓妾及帝所乘五百
里駿馬以遣之及隋文帝執政尉遲迴王謙司馬消難
等各起兵時歸將帥皆密請興師與迴等為連衡之勢
進可以盡節於周氏退可以席卷山南歸以為不可俄
而消難奔陳迴等相次破滅隋文帝既踐極恩禮彌厚
遣使賜金五百兩銀千兩布帛萬疋馬五百匹開皇二
年隋文帝備禮納歸女為晉王妃又欲以其子瑒尚蘭

陵公主由是罷江陵總管歸專制其國四年入朝長安
帝甚敬待之詔歸位在王公之上歸被服端麗進退閑
雅天子矚目百僚傾慕帝賜歸繅萬疋珍玩稱是及還
親執其手謂之曰梁主久滯荆楚未復舊都朕當振旅
長江相送旋反歸拜謝而歸五年五月寢疾薨臨終上
表奉辭并獻所服金裝劍帝覽而嗟悼歸在位二十三
年梁之臣子葬之顯陵謚曰孝明皇帝廟號世宗歸孝
悌慈仁有君人之量四時祭享未嘗不悲慕流涕性尤

儉約御下有方境內安之所著文集及孝經周易義記及大小乘幽微並行於世文帝又命其太子琮嗣位

琮字溫文性倣儻不羈博學有文義兼善弓馬遣人伏地持帖琮奔馬射之十發十中持帖者亦不懼初封東陽王尋立為梁太子及嗣位帝賜以璽書敦勉之又賜梁之大臣璽書誠勉之時琮年號廣運有識者曰運之為字軍走也吾君將奔走乎其年琮遣大將軍戚昕以舟師襲陳公安不克而還文帝徵琮叔父岑入朝拜大

將軍封懷義公因留不遣復置江陵總管以監之琮所署大將軍許世武密以城召陳將宜黃侯陳紀謀泄琮誅之後二歲文帝徵琮入朝琮率臣下二百餘人入長安江陵父老莫不隕涕曰吾君其不反矣文帝以琮來朝遣武鄉公崔弘度將兵戍之軍至荊州琮叔父嚴及弟璫等懼弘度掩襲之遂引陳人至城下虜居民而叛於是廢梁國文帝遣左僕射高穎安集之曲赦江陵死臯給復十年梁二主各給守墓十戶拜琮柱國賜爵莒

國公自誓初即位歲在乙亥至是歲在丁未凡三十三載而亡琮至煬帝嗣位甚見親重拜內史令改封梁公琮之宗族總麻以上並得隨才擢用於是諸蕭昆弟布列朝廷琮性澹雅不以職務自嬰退朝縱酒而已內史令楊約與琮同列帝令約宣旨誠勵約復以私情諭之琮曰琮若復事事則何異公哉約笑而退約兄素時為尚書令見琮嫁從父妹於鉗耳氏謂曰公帝王之族何乃適妹鉗耳氏琮曰前已嫁妹於侯莫陳氏此復何疑

素曰鉗耳羌也侯莫陳虜也何得相比琮曰以羌異虜
未之前聞素慙而止琮雖羈旅見北間豪貴無所降下
常與賀若弼深友弼既誅復有童謠曰蕭蕭亦復起帝
由是忌之遂廢於家卒贈左光祿大夫子鉉位襄城通
守復以琮弟子鉅為梁公鉅小名曰藏煬帝甚昵之以
為千牛與宇文暉出入宮掖伺察內外帝每有遊宴鉅
未嘗不從遂於宮中多行淫穢江都之變為宇文化及
所殺晉之居帝位百寮追謚長子嶠為孝惠太子次子

巖封安平王岌東平王岑河間王後改封吳郡王琮弟
璪義興王瑒晉陵王璟臨海王珣南海王瑒義安王以
蔡大寶為股肱王操為腹心魏益德尹正薛暉許孝敬
薛宣為爪牙甄元成劉盈岑善方傅淮褚珪蔡大業典
衆務張綰以舊齒處顯位沈重以儒學蒙厚禮自餘多
所獎拔咸盡其器能及歸纂業親賢並用將相則華皎
殷亮劉忠義宗室則蕭欣蕭翼人望則蕭確謝溫柳洋
王湜徐岳外戚則王洋王誦殷璉文章則劉孝勝范迪

沈居游君公柳信言政事則表敞柳莊蔡延壽甄胡皇
甫茲故能保其疆土而和其人焉今載答子嶠等及蔡
大寶以下尤著者附于左其在梁陳隋已有傳及歸諸
子未任職者則不兼錄

嶠字道遠答之長子也母曰宣靜皇后答之為梁王立
為世子尋病卒及答稱帝追謚焉

巖字義遠答第五子也性仁厚善撫接厯尚書令太尉
太傅入陳授東揚州刺史及陳亡百姓推巖為主為總

管宇文述所破伏法於長安

岌岌第六子也性淳和位至侍中中衛將軍歸之五年卒贈司空謚曰孝

岑字智遠岌第八子也位至太尉性簡貴御下嚴整及琮嗣位自以望重屬尊頗有不法故隋文徵入朝拜大將軍封懷義郡公

璫字欽文歸第三子也幼有令譽能屬文位荊州刺史頗有能名崔弘度兵至荊州璫懼與其叔父巖奔陳陳

主以為侍中吳州刺史甚得物情三吳父老皆曰吾君之子陳亡吳人推之為主吳人見梁武簡文及詔歸等兄弟中並第三而踐尊位璫自以歸第三子深自矜負有謝異者頗知廢興梁陳之際言無不驗江左人甚敬信之及陳主被禽異奔璫由是益為眾所歸宇文述之討璫也璫遣王褒守吳州自將拒述述遣兵別道襲褒褒衣道士服棄城而遁璫敗將左右數人逃于太湖匿于人家被執述送長安斬之璟仕隋尚衣奉御瑒衛尉

卿秘書監陶邱侯瑀內史侍郎河池太守

蔡大寶字敬位濟陽考城人祖履齊尚書祠部郎父點
梁尚書儀曹郎南充州別駕大寶少孤而篤學不倦善
屬文初以明經對策第一解褐武陵王國左常侍嘗以
書千僕射徐勉勉甚賞異乃令與其子遊處所有墳籍
盡以給之遂博覽羣書學無不綜答初出第勉仍薦大
寶為侍讀兼掌記室尋除尚書儀曹郎答出鎮會稽大
寶詣選曹求諮議不得以為記室大寶攘臂而出曰不

為孫秀非人也。咎泣襄陽，遷諮議參軍。謀謨皆自大寶出。及梁元帝與河東王譽構隙，咎令大寶使江陵以觀之。元帝素知大寶，見之甚悅，乃示所製元覽賦，令注解焉。三日而畢。元帝大嗟賞之，贈遺甚厚。大寶還，白咎云：「湘東必有異圖，禍亂將作，不可下援。」臺城咎納之。及咎於江陵稱帝，為侍中、尚書令、參掌選事，進位柱國、軍師將軍，封安豐縣侯，歸嗣位冊，授司空中書監、中權大將軍、領吏部尚書，固讓司空，許之。加特進，歸之。三年卒。及

葬歸三臨其喪贈司徒進爵為公謚曰文凱配食祭廟
庭大寶性嚴整有智謀雅達政事文辭贍速祭之章表
書記教令詔冊並大寶專掌之祭推心委任以為謀主
時人以祭之有大寶猶劉先主之有孔明焉所著文集
三十卷及尚書義疏並行於世有四子次子延壽有器
識博涉經籍尤善當世之務尚祭女宣城公主厯中書
郎尚書左丞吏部郎御史中丞從琮入隋授開府儀同
三司祕書丞終於成州刺史大寶弟大業字敬道有至

行位散騎常侍衛尉卿都官尚書太常卿卒贈金紫光祿大夫謚曰簡有五子允恭最知名位太子舍人梁滅入陳為尚書庫部郎陳亡仕隋起居舍人

王操字子高其先太原晉陽人譽母龔氏之外弟也性敦厚有籌略初為譽外兵參軍親任亞於蔡大寶及譽稱帝歷五兵尚書郢州刺史進位柱國封新康縣侯歸嗣位授鎮右將軍尚書僕射及吳明徹為寇歸出頓紀南操撫循將士莫不用命明徹既退江陵獲全操之力

也遷侍中中衛將軍尚書令開府儀同三司領荊州刺史操既位居朝右每日挹損深得當時之譽卒歸舉哀於朝堂流涕曰天不使吾平蕩江表何奪吾賢相之速也及葬親祖於瓦宮門贈司空進爵為公謚曰康節有七子次子衡最知名有才學位中書黃門侍郎

魏益德襄陽人也有材幹膽勇過人嘗稱帝進位柱國封上黃縣侯卒贈司空謚曰忠壯進爵為公歸之五年以益德配食嘗廟庭

尹正其先天水人。嘗泣雍州正為其府中兵參軍。禽張
績。獲杜岸。皆正之力。嘗稱帝除護軍將軍。位柱國。封新
野縣侯。卒。贈開府儀同三司。謚曰剛。歸之五年。以正配
食。嘗廟庭。子德毅。多權略。位大將軍。後以見疑。賜死。
甄元成。字敬平。中山人。博達經史。善屬文。少為簡文所
知。以錄事參軍隨。嘗鎮襄陽。轉中記室參軍。頗參政事。
以江陵甲兵殷盛。遂懷貳心。密書與元帝。具申誠款。或
有得其書。送於嘗。嘗深信佛法。常願不殺誦法華經人。

元成素誦法華經遂以此獲免
譽後見之常曰甄公好
得法華經力後位吏部尚書有文集二十卷子調少沈
敏閑習政事歷中書舍人尚書右丞從琮入隋授開府
儀同三司終於太府少卿

岑善方字思義南陽棘陽人祖惠甫給事中父昶散騎
侍郎善方有器局博綜經史以刑獄參軍隨譽至襄陽
譽初請內附以善方兼記室充使往來凡數十反魏恭
帝二年封長寧縣公及譽稱帝位散騎侍郎起部尚書

善方性清慎有當世幹能故詔委以機密卒贈太常卿
謚曰敬所著文集十卷有七子並有操行之元之利之
象最知名之元太子舍人早卒之利仕隋位零陵郡丞
之象仕隋尚書虞部員外侍郎邵陵上宜渭南邯鄲四
縣令

宗如周南陽人有才學以府僚隨詔後至度支尚書如
周面狹長髻以法華經云聞經隨喜面不狹長嘗戲之
曰卿何為謗經如周蹶踏自陳不謗詔又謂之如初如

周懼出告蔡大寶大寶知其旨笑謂之曰君當不謗餘
經正應不信法華耳如周乃悟又嘗有人訴事於如周
謂為經作如州官也乃曰某有屈滯故來訴如州官如
周曰爾何小人敢呼我名其人慙謝曰祇言如周官作
如州不知如周官名如周早知如周官名如州則不敢
喚如周官作如州如周乃笑曰令卿自責見侮反深衆
咸服其寬雅

表敞陳郡人祖昂司空父仕俊安成內史敞少有識量

博涉文史以吏部郎使詣周時主者以敞班在陳使之
後敞固不從命曰昔陳之祖父乃梁諸侯下吏盜有江
東今周朝宗萬國招攜以禮若使梁之行人在陳之後
便慙曩倫失序豈使臣之所望焉主者不能屈遂以狀
奏周武帝善之乃詔敞與陳使異日而進使還以稱旨
遷侍中轉左戶尚書從琮入隋授開府儀同三司終於
譙州刺史

通志卷一百九十三

欽定四庫全書

史部
通志卷一百九十四

詳校官編修_臣李潢

編修_臣裴謙覆勘

覆校官助教_臣金學詩

校對官主事_臣張培

謄錄舉人_臣謝錫位

欽定四庫全書

通志卷一百九十四

宋右廸功郎鄭樵漁仲撰

四夷傳第一

東夷

東夷序畧 朝鮮 濊音 馬韓 辰韓 弁韓

弁辰 百濟耽牟羅國附 新羅 倭 夫餘 高句麗

東沃沮

北沃沮附 七余反

挹婁

勿吉

又曰扶桑國 附

文身大漢附流求 閩粵

東夷序畧

王制云東方曰夷夷者柢也言仁而好生萬物柢地而

出故天性柔順易以道御至有君子不死之國焉山海經曰

君子國衣冠帶劔食獸使二文虎在旁外國圖曰去琅邪三萬里山海經曰不死人在交脛東其為人黑色壽不死並在東方也夷有九種曰畎夷千夷方夷黑夷白夷赤夷

元夷風夷陽夷故孔子欲居九夷也九夷率皆土著意

飲酒歌儻或冠弁衣錦器用俎豆所謂中國失禮求之

四夷者也昔堯命羲仲宅嵎夷曰暘谷蓋日之所出也
夏后氏太康失德夷人始畔自少康已後世服王化遂
賓於王門獻其樂舞桀為暴虐諸侯內侵殷湯革命伐
而定之至於仲丁監夷作寇自是或服或畔三百餘年
武乙衰敝東夷寢盛遂分遷淮岱漸居中土及武王滅
紂肅慎來獻石砮楛矢管蔡畔周乃招誘夷狄周公征
之遂定東夷康王之時肅慎後至後徐夷僭號乃率九
夷以伐宗周西至河上穆王畏其方熾乃分東方諸侯

命徐偃王主之偃王處潢池東地方五百里行仁義陸地而朝者三十有六國穆王後得驥騮之乘乃使造父御以告楚令伐徐一日而至於楚文王大舉兵而滅之偃王仁而無權不忍鬪其人故致於敗乃北走彭城武原縣東山下百姓隨之者以萬數因名其山為徐山厲王無道淮夷入寇王命虢仲征之不克宣王復命名公伐而平之及幽王淫亂四夷交侵至齊桓修霸攘而卻焉及楚靈會申亦來豫盟後越遷琅邪與共征戰遂

陵暴諸夏侵滅小邦秦并六國其淮泗夷皆散為民戶
陳涉起兵天下崩潰燕人衛滿避地朝鮮因王其國百
有餘歲武帝滅之於是東夷始通上京王莽篡位貊人
寇邊建武之初復來朝貢時遼東太守祭彤威讐北方
聲行海表於是濊貊倭韓萬里朝獻故章和已後使聘
流通建永初多難始入寇抄桓靈失政漸滋蔓焉漢末
公孫氏據遼東五十年魏晉又得其地其三韓之地在
海島之上朝鮮之東南百濟新羅魏晉以後分王韓地

新羅在百濟之東南倭又在其東南隔越大海夫餘在高麗之北挹婁之南其倭及夫餘自後漢百濟新羅自魏歷代朝貢中國不絕而百濟至唐顯慶中始為蘓定方所滅高麗本朝鮮地漢武置縣屬樂浪郡時甚微弱東漢以後累代皆受中國封爵所都平壤城則故朝鮮國王險城也後魏周齊漸以疆盛隋文帝時寇遼西漢王諒帥兵討之至遼水遭癘疫而返煬帝三度親征初渡遼水敗績再行次遼水會楊元感反奔退又往將達

涿郡屬天下賊起及飢饉旋師唐貞觀中太宗親征遼
破之高宗總章初英國公李勣遂滅其國古之肅慎疑
即魏時挹婁自周初貢楛矢石砮至魏常道鄉公末東
晉元帝初及石虎時並皆獻之後魏以後曰勿吉國唐
則曰靺鞨焉大抵東夷書文與華夏並同其閩越之地
秦平天下以為郡及秦亂其帥又自稱王於故地武帝
元封初樓船將軍楊僕滅其國遷其人於江淮間而虛
其地自後雖人庶復集遂為郡縣矣

朝鮮

朝鮮周封殷太師之國太師教以禮義田蠶作八條之教無門戶之閉而人不為盜其後四十餘代至戰國時朝鮮亦僭稱王始全燕時嘗畧屬焉為置吏築障塞秦滅燕屬遼東外徼及秦亂中國人往避地者數萬口漢興為其遠難守復修遼東故塞至涇水為界

涇水在樂浪縣音普

蓋反屬燕燕王盧綰反入匈奴燕人衛滿亡命聚黨千餘

人推結蠻夷服而東走出塞渡涇水居秦故空地上下

障稍後屬真番朝鮮蠻夷及故燕齊亡在者王之都王

險

地名也

會孝惠高后時天下初定遼東太守即約滿為

外臣保塞外蠻夷毋使盜邊蠻夷君長欲入見天子勿

得禁止以聞上許之以故滿得以兵威財物侵降其旁

小邑真番臨屯皆來服屬方數千里傳子至孫右渠所

誘漢亡人滋多又未嘗入見真番辰國欲上書見天子

又雍閼弗通元封二年漢使涉何譙諭右渠終不肯奉

詔何去至界臨湏水使馭刺殺送何者朝鮮裨王長即

渡水馳入塞遂歸報天子曰殺朝鮮將上為其名美弗
詰拜何為遼東東部都尉朝鮮怨何發兵襲攻殺何天
子募罪人擊朝鮮其秋遣樓船將軍楊僕從齊浮渤海
兵五萬左將軍荀彘出遼東誅右渠右渠發兵距險左
將軍卒多率遼東士兵先縱敗散多還走坐法斬樓船
將軍兵七千人先至王險右渠城守窺知樓船軍少即
出擊樓船樓船軍敗走將軍僕失其衆遁山中十餘日
稍求收散卒復聚左將軍擊朝鮮浞水西軍未能破天

子為兩將未有利乃使衛山因兵威往諭右渠右渠見使者頓首謝願降恐將詐殺臣今見使節請服降遣太子入謝獻馬五千疋及餽軍糧人衆萬餘持兵方渡湏水使者及左將軍疑其為變謂太子已服降遂令人無持兵太子亦疑使者左將軍詐之遂不渡湏水復引歸山報天子誅山左將軍破湏水上軍乃前至城下圍其西北樓船亦往會居城南右渠遂堅城守數月未能下左將軍素侍中幸將燕代卒悍乘勝軍多驕樓船將薺

卒入海已多敗亡其先與右渠戰困辱亡卒卒皆恐將
心慙其圍右渠常持和節左將軍急擊之朝鮮大臣乃
陰間使人私約降樓船往來言尚未肯決左將軍素與
樓船期戰樓船欲就其約不會左將軍亦使人求間隙
降下朝鮮不肯心附樓船以故兩將不相得左將軍心
意樓船前有失軍罪今與朝鮮和善而又不降疑其有
反計未敢發天子曰將卒不能制乃使衛山諭降右渠
不能顓決與左將軍相誤卒阻約今兩將圍城又乖異

以故久不決使故齊南太守公孫遂往正之有便宜得
以從事遂至左將軍曰朝鮮當下久矣不下者樓船數
期不會具以素所意告遂曰今如此不取恐為大害非
獨樓船又且與朝鮮共滅吾軍遂亦以為然而以節召
樓船將軍入左將軍軍計事即令左將軍麾下執縛樓
船將軍并其軍以報天子許遂左將軍已并兩軍即急
擊朝鮮相路人相韓陶尼谿相參將軍王映相路人一
人相韓陶
一人尼谿相參一人將
軍王映一人映音頻相與謀曰始欲降樓船樓船今

執獨左將軍并將戰益急恐不能與王又不肯降陶峽
路人皆亡降漢路人道死元封三年夏尼谿相參乃使
人殺朝鮮王右渠來降王險城未下故右渠大臣成已
又反復攻吏左將軍使右渠子長降相路人子最告諭
其民誅成已故遂定朝鮮為真番臨屯樂浪元菟四郡
封參為瀋清侯瀋音獲陶為秋菑侯菑音余反峽為平州侯長
為幾侯最以父死頗有功為沮陽侯左將軍徵至坐爭
功相嫉妬乖計棄市樓船將軍亦坐兵至列口當待左

將軍擅先縱失亡當誅贖為庶人朝鮮自內屬以後風俗稍薄法禁亦寢多至於六十餘條

濊

濊北與高句麗

力之反

沃沮南與辰韓接東窮大海西至

樂浪濊及沃沮句麗本皆朝鮮之地也漢武帝元朔五年濊君南閭等畔朝鮮王右渠率二十八萬口詣遼東內屬武帝以其地為蒼海郡數年乃罷元封三年漢滅朝鮮分置樂浪臨屯元菟真番四郡昭帝始元五年罷

臨屯真番以并樂浪元菟元菟復徙居句麗自單單大
領已東沃沮濊貊悉屬樂浪後以境土廣遠復分領東
七縣置樂浪東部都尉後漢建武六年省都尉官悉封
其渠帥為縣侯皆歲時朝賀無大君長自漢以來其官
有侯邑君三老統主下戶其耆舊自謂與高麗同種言
語法俗大抵相類其人性愚慤少嗜欲不請勾男女皆
衣曲領男子繫銀花廣數寸以為飾不以珠玉為寶其
俗重山川山川各有部分不得妄相干涉同姓不婚多

所忌諱疾病死亡即棄舊宅更作新居知種麻養蠶作
綿布曉候星宿豫知年歲豐約常用十月祭天晝夜飲
酒歌舞名之為舞天又祠虎以為神其邑落有侵犯者
輒相罰責生口牛馬名之為責禍殺人者償死少寇盜
能步戰作矛長三丈或數人共持之樂浪檀弓出其地
又多文豹有果下馬高三尺乘之可行果樹下其海出班魚皮漢桓
帝時常獻之魏齊王正始六年樂浪太守劉茂帶方太
守弓遵以領東濊屬句麗興師伐之不耐濊侯等舉邑

降後二年詣闕朝貢詔更拜不耐濊王居處雜在民間
四時詔樂浪帶方二郡朝謁有軍征賦調如中華人焉

馬韓

韓在帶方之南東西以海為限南與倭接方可四千里
有三種一曰馬韓二曰辰韓三曰弁韓辰韓者古之辰
國也馬韓在其西其民土著種植知蠶桑作綿布各有
長帥大者自名為臣智其次為邑借散在山海間無城
郭有爰婁國牟水國桑外國小石索國大石索國優休

年涿國臣潰沽國伯濟國速盧不斯國日華國古誕者
國古離國怒藍國月支國咨離牟盧國素謂乾國古爰
國莫盧國卑離國占離卑國臣蒙國支侵國狗盧國卑
彌國監奚卑離國古蒲國致利鞠國冉路國兒林國駟
盧國內卑離國感奚國萬盧國辟卑離國白斯烏旦國
一離國不彌國支半國狗素國捷盧國牟盧卑離國臣
蘓塗國莫盧國古臘國臨素半國臣雲新國如來卑離
國楚山塗卑離國一難國狗奚國不雲國不斯潰邪國

爰池國乾馬國楚離國凡五十餘國大國萬餘家小國
數千家總十餘萬戶辰王治月支國臣智或加優呼臣
雲遣支報安邪跖支潰臣離兒不例拘邪秦支廉之號
其官有魏率善色君歸義侯中郎將都尉伯長侯後既
僭號稱王為燕亡人衛滿所攻奪將其左右宮人走入
海居韓地自號韓王其後絕滅今韓人猶有奉其祭祀
者漢時屬樂浪郡四時朝謁桓靈之末韓滅疆盛郡縣
不能制民多流入韓國建安中公孫康分屯有縣以南

荒地為帶方郡遣公孫模張敞等收集遺民興兵伐韓
滅舊民稍出是後倭韓遂屬帶方魏景初中明帝密遣
帶方太守劉昕樂浪太守鮮于嗣越海定二郡諸韓國
臣智加賜邑君印綬其次與邑長其俗好衣幘下戶詣
郡朝謁皆假衣幘自服印綬衣幘千有餘人部從事吳
林以樂浪本統韓國分割辰韓八國以與樂浪吏譯轉
有異同臣漬沽韓忿攻帶方郡崎離營時太守弓遵樂
浪太守劉茂興兵伐之遵戰死二郡遂滅韓其俗少綱

紀國邑雖有主帥邑落雜居不能善相制御無跪拜之禮居處作草屋土室形如冢其戶在上舉家共在中無長幼男女之別其葬有棺無槨不知乘牛馬牛馬盡於送死以纓珠為財寶或以綴衣為飾或以縣頸垂耳不以金銀錦繡為珍其人性彊勇魁頭露紛身衣布袍足履革躋其國中有所作為及官家使築城郭諸年少勇健者皆鑿脊皮以大繩貫之又以大許木錘之通日驩呼作力不以為痛既以勸作且以為健常以五月下種

訖祭鬼神羣聚歌舞飲酒晝夜無休其舞數十人俱起
相隨踏地低昂手足相應節奏有似鐸舞十月農功畢
亦復如之信鬼神國邑各立一人主祭天神名之天君
又諸國各有別邑名之為蘇塗立大木懸鈴鼓事鬼神
諸逃亡至其中皆不還之好作賊其立蘇塗之義有似
西域浮屠而所行善惡有異其北方近郡諸國差曉禮
俗其遠處直如囚徒奴婢相聚無他珍寶禽獸草木畧
與中國同出大栗大如梨又出細尾雞其尾皆長五尺

餘其男子時或有文身又有州胡在馬韓之西海中大
島上其人差短小言語不與韓同皆髡頭如鮮卑但衣
韋好養牛及豬其衣有上無下畧如裸勢乘船市買往
來中韓後漢建武二十一年韓人廉斯人蘇馬謨等詣

樂浪貢獻

廉斯邑名也謨音是

光武封蘇馬謨為漢廉斯邑君使

屬樂浪郡四時朝謁晉武帝太康元年二年其王頻遣
使入貢方物七年八年十年又頻至大熙元年詣東夷
校尉何龕上獻咸寧三年復來明年又請內附

晉史載裨離等

十國云裨離國在肅慎西北馬行可二百日領戶二萬
養雲國去裨離馬行又五十日領戶一萬寇莫汗國去
養雲國又百日行領戶五萬餘一羣國去莫汗又百五
十日計去肅慎五萬餘里其風俗土壤並未詳泰始三
年各遣小部獻共方物至太熙初復有牟奴國帥逸芝
惟離模盧國帥沙支臣芝干離未利國帥加牟臣芝蒲
都國帥因未繩余國帥馬路沙樓國帥鈇
加各遣正副使詣東夷後尉何龕歸化

辰韓

辰韓在馬韓之東其耆老相傳自言古之亡人避秦役
來適韓國馬韓割其東界地與之有城柵其言語不與
馬韓同名國為邦弓為弧賊為寇行酒為行觴相呼皆

為徒有似秦人非但燕齊之名物也名樂浪人為阿殘
東方人名我為阿謂樂浪人本其殘餘人今有名之為
秦韓者始有六國稍分為十二國

弁韓

弁韓亦十二國又有諸小別邑各有渠帥大者名臣智
其次有險側次有樊濊次有殺奚次有邑借有已祇國
不斯國弁辰彌離彌凍國弁辰接塗國勤耆國難彌離
彌凍國弁辰古資彌凍國弁辰古淳是國冉奚國弁辰

半路國弁樂奴國軍彌國弁軍彌國弁辰彌烏邪馬國
如湛國弁辰甘路國尸路國州鮮國馬延國弁辰狗邪
國弁辰走漕馬國弁辰安邪國馬邪國弁辰瀆盧國斯
盧國優由國弁辰韓合二十四國大國四五千家小國
六七百家總四五萬戶其十二國屬辰王辰王常用馬
韓人作之世世相繼辰王不得自立為王土地肥美宜
種五穀及稻曉蠶桑作縑布乘駕牛馬嫁娶禮俗男女
有別以大鳥羽送死其意欲使死者飛揚國出鐵韓濊

倭皆從取之諸市買皆用鐵如中國用錢又以供給二郡俗喜歌舞飲酒有瑟其形似筑彈之亦有音曲兒即便以石壓其頭欲其褊今辰韓人皆褊頭男女近倭亦文身便步戰兵仗與馬韓同其俗行者相逢皆住讓路晉武帝太康元年其王遣使獻方物二年復來朝貢七年又來

弁辰

弁辰與辰韓雜居亦有城郭衣服居處與辰韓同言語

法俗相似祠祭鬼神有異施竈皆在戶西其瀆盧國與倭接界十二國亦有王其人形皆大衣服潔清長髮亦作廣幅細布法俗特嚴峻

百濟耽牟羅國附

百濟即後漢末夫餘王尉仇台之後初以百家濟海因號百濟晉時高句麗既畧有遼東百濟亦據有遼西晉

平二郡

今柳城北平之間

自晉以後并吞諸國據有馬韓故地

其國東西四百里南北九百里南接新羅北拒高麗千

餘里西限大海處小海之南其都曰居拔城亦曰固麻城其外更有五方中方曰古沙城東方曰得安城南方曰久知下城西方曰乃先城北方曰熊津城王姓餘氏號於羅瑕百姓號為韃吉支夏言並王也王妻號於陸夏言妃也官有十六品左率五人一品達率三十人二品恩率三品德率四品扞率五品奈率六品已上冠飾銀花將德七品紫帶施德八品皂帶固德九品赤帶季德十品青帶對德十一品文督十二品皆黃帶武督十

三品佐軍十四品振武十五品尅虐十六品皆白帶恩
率以下官無常員各有部司分掌衆務內官有前內部
穀內部內掠部外掠部馬部刀部功德部藥部木部法
部後宮部外官有司軍部司徒部司空部司寇部點口
部客部外舍部綱部百官部市部長吏三年一代都下
有方分為五部曰上部前部中部下部後部部有里巷
士庶居焉部統兵五百人五方各有方領一人以達率
為之方佐貳之方有十郡郡有將三人以德率為之統

兵一千二百人以下七百人已上城之內外人庶及餘
小城皆分隸焉其人雜有新羅高麗倭等亦有中國人
其飲食衣服畧與高麗同若朝拜祭祀其冠兩廂加翅
戎事則否拜謁之禮以兩手據地為禮婦人不加粉黛
女辮髮垂後已出嫁則分為兩道盤於頭上衣似袍而
袖微大兵有弓箭刀稍俗重騎射兼愛墳史而秀異者
頗解屬文能史事又知醫藥著龜與相術陰陽五行法
有僧尼多寺塔而無道士有鼓角篳篥箏箏箎笛之樂

板壺擣弄珠握槊等雜戲尤高弈碁行宋元嘉厯以
建寅月為歲首賦稅以布絹絲麻及米等量歲豐儉差
等輸之其刑罰反叛退軍及殺人者斬盜者流其賊兩
倍徵之婦犯姦沒入夫家為婢婚娶之禮畧同華俗父
母及夫死者三年居服餘親則葬訖除之土田濕氣候
溫暖其五穀雜果菜蔬及酒醴餽饌之屬多同於內地
唯無駝騾驢羊鵝鴨等國西南海中有三島出黃漆樹
似小欒樹而大六月取汁漆器物若黃金其光奪目國

中大姓有八曰族沙氏燕氏劓氏

劓音使

解氏真氏國氏

木氏菑氏

菑音白

其王每以四仲月祭天及五帝之神立

其始祖仇台之廟於國城歲四祠之國西南人島居者

十五所皆有城邑晉義熙十二年以百濟王餘腆為使

持節都督百濟諸軍事鎮東將軍百濟王宋武帝踐阼

進號鎮東大將軍少帝景初二年腆遣長史張威詣建

康貢獻元嘉二年文帝詔兼謁者問邱恩子兼副謁者

丁敬子等往宣旨慰勞其後每遣使入貢七年百濟王

餘毗復修貢職以腆爵號授之二十七年毗上書獻方物私假臺使馮野夫西河太守表求易林式占腰弩帝並與之毗死子慶代立孝武大明初遣使求除授詔許之一年慶表言行冠軍將軍右賢王餘紀等十一人忠勤並求顯進朝旨並加優授明帝泰始七年又遣使貢獻後魏延興二年慶復遣其冠軍將軍駙馬都尉弗斯侯長史餘禮龍驤將軍帶方太守司馬張茂等納貢代都且上表曰臣與高麗源出夫餘先世之時篤崇舊款

其祖釗輕廢隣好陵踐臣境臣祖須整旅電邁梟斬釗
首自爾以來莫敢南顧自馮氏數終餘燼奔竄醜類漸
盛遂見侵陵構怨連禍三十餘載若天慈曲矜遠及無
外速遣一將來救臣國當奉送鄙女執婦後宮并遣子
弟牧圉外厩尸壤匹夫不敢自有去庚戌年臣西界海
中見尸十餘并得衣器鞍勒辨驗非是高麗之物後聞
乃是王來國人遠降臣國長蛇隔路以阻於海今上所
得鞍一以為實據魏主以其僻遠冒險入獻禮遇優厚

遣使者邵安與其使俱還詔曰得表聞之無恙卿與高麗不睦致被陵犯苟能順義守之以仁亦何憂於寇讐也前所遣使浮海以撫方外之國從來積年徃而不反存亡達否未能審悉卿所送鞍比較舊乘非高麗之物不可以疑似之事以生必然之過經畧權要已具別旨又詔曰高麗稱藩先朝供職日久於彼雖有自昔之蒙於國未有犯令之愆卿使命始通便求致伐尋討事會理亦未周所獻錦布海物雖不悉達明卿至心今賜雜

物如別又詔高麗王璉護送安等至其國璉稱昔與餘慶有讐言不令東過安等於是皆還明年使安等從東萊浮海賜餘慶璽書褒其誠節安等至海濱遇風飄蕩竟不達而反慶死子牟都立都死子牟太立齊永明中授牟太大都督百濟諸軍事鎮東大將軍百濟王梁天監元年進號征東將軍尋為高麗所破衰弱累年遷居南韓地普通二年王餘隆始復遣使奉表稱累破高麗今始與通好其年武帝詔隆為使持節都督百濟諸軍事

寧東大將軍百濟王五年隆死詔復以其子明為持節
都督百濟諸軍事綏東將軍百濟王中大通六年大同
七年累遣使來貢并請涅槃等經義毛詩博士并工匠
畫師等並給之太清三年侯景犯順百濟使至見城闕
荒毀並號慟涕泣侯景怒囚執之景平乃得還國侯景
陷建業之明年東魏靜帝禪位於齊百濟又通使于鄴
齊武平初後主以百濟王餘昌為使持節侍中車騎大
將軍帶方郡公王如故三年又以昌為持節都督東青

州諸軍事東青州刺史周建德六年齊滅昌始奉表通
周宣政元年又遣使入獻隋開皇初昌仍修歲貢文帝
拜昌上開府帶方郡公百濟王平陳之歲戰船漂至海
東就牟羅國其船得還經於百濟昌資送之甚厚并遣
使奉表賀平陳文帝善之下詔曰彼國懸隔來往至難
自今以後不須頻年入貢使者舞蹈而去八年昌使其
長吏王辯邠來獻方物屬興遼東之役仍奉表請為軍
導帝下詔厚其使而遣之高麗頗知其事兵侵其境昌

死子餘璋立大業三年璋遣使燕文進朝貢其年又遣使王孝隣入獻請討高麗煬帝許之命覘高麗動靜然璋內與高麗通和挾詐以窺中國七年帝親征高麗璋使其臣國智牟來請軍期帝大悅厚加賞賜遣尚書起部郎席律詣百濟與相知明年六軍渡遼璋亦嚴兵於境聲言助軍實持兩端尋與新羅有隙每相戰爭十年復遣使朝貢後天下亂使命遂絕其南海行三月有耽牟羅國南北千餘里南西數百里土多麋鹿附庸於百

濟西行三日至貊國千餘里云

新羅

新羅魏時新盧國也其先本辰韓種辰韓始有六年稍

分為十二新羅則其一也

初曰新羅宋時曰新羅或曰斯盧

其國在百

濟東南五百餘里

亦在高麗東南兼有漢時樂浪郡之地

東濱大海魏將

毋邱儉討高麗破之高麗奔沃沮其後復歸故國留者

遂為新羅焉故其人雜有華夏高麗百濟之屬兼有沃

沮韓濊之地其王本百濟人自海逃入新羅遂王其國

初附屬於百濟後因百濟伐高麗人不堪戎役相率歸之遂致彊盛因襲伽羅任鄒諸國滅之其西北界犬牙出高麗百濟之間先是其國小不能自通使聘苻堅時其王樓寒遣使衛頭朝貢堅曰卿言海東之事與古不同何也對曰亦猶中國時代變革名號改易今焉得同梁武帝普通二年王姓慕名秦始使人隨百濟獻方物其俗呼城曰健牟羅其邑在內曰喙評喙呼在外曰邑勒亦中國之言郡縣也國有六喙評五十二邑勒土地

肥美宜植五穀多桑麻果菜鳥獸物產畧與華同至隋

開皇十四年遣使來貢其王姓金名真平

隋東蕃風俗記云金姓相

承三十餘葉

文帝拜為上開府樂浪郡公新羅王

其王至唐時亦姓金

梁史云姓慕未詳中間更變之由

其官有十七等其一曰伊罰于貴如

國相次伊尺于次迎于次破彌于次大阿尺于次阿尺

于次乙吉于次沙咄于

咄都沒反

次及伏于次大奈摩于次

奈摩次大舍次小舍次吉土次大烏次小烏次造位外

有郡縣

梁史又云其國官名有子賁旱支壹旱支齊旱支謁旱支壹吉支奇貝旱支又云其冠曰遺子

禮襦曰耐解袴曰柯半靴曰洗

文字甲兵同於中國選人壯健者悉入

軍烽戍邏俱有屯管部伍風俗刑政衣服畧與高麗百
濟同每月旦相賀王設燕會班賚羣官其日拜日月神
主八月十五日設樂令官人射賞以馬布其有大事則
聚官詳議定之服色尚畫素婦人辮髮繞頭以雜綵及
珠為飾婚嫁禮唯酒食而已輕重隨其貧富新婦之夕
婦先拜舅姑次拜大兄次拜夫死有棺斂送葬起墳陵
王及父母妻子喪居服一年大業以來歲遣朝貢新羅

地多山險雖與百濟構隙百濟亦不能圖之也唐貞觀二十三年其王金春秋來朝拜為特進請改章服以從華制

倭

倭自後漢時通馬在帶方東南大海之中依山島為國邑舊百餘國自漢孝武滅朝鮮使驛通於漢者三十許國國皆稱王世世傳統自帶方郡至倭循海岸水行歷韓國乍南乍東到其北岸拘邪韓國七千餘里始度一

海千餘里至對馬國其大官曰卑狗副曰卑奴母離所
居絕島方可四百餘里土地山險多深林道路如禽鹿
徑有千餘戶無良田食海物自活乘船南北市糴又南
度一海千餘里名曰瀚海至一大國官亦曰卑狗副曰
卑奴母離方可三百里多竹木叢林有三千許家差有
田地耕田猶不足食亦南北市糴又度一海千餘里至
末盧國有四千餘戶濱山海居草木茂盛行不見前人
好捕魚水無深淺皆沈沒取之東南陸行五百里到伊

都國官曰爾支副曰泄謨觚柄渠觚有千餘戶世有王
皆統屬於倭國郡使往來常所駐東南至奴國百里官
曰兕馬觚副曰卑奴母離有二萬餘戶東行至不彌國
百里官曰多模副曰卑奴母離有千餘家南至投馬國
水行二十日官曰彌彌副曰彌彌觚利可五萬餘戶南
至邪馬臺即倭國之所都也邪馬臺亦曰邪
靡堆音之訛也水行十日
陸行一月官有伊支馬次曰彌馬升次曰彌馬獲支次
曰奴佳鞮可七萬餘戶自倭國以北其戶數道里可得

畧載其餘旁國遠絕不可得詳次有斯馬國次有已百
支國次有伊邪國次有都支國次有彌奴國次有好古
都國次有不呼國次有姐姐國次有對蘇國次有蘇奴
國次有呼邑國次有華奴蘇奴國次有鬼國次有為吾
國次有鬼奴國次有邪馬國次有躬臣國次有巴利國
次有支惟國次有烏奴國次有奴國此倭國境界所盡
其南有狗奴國其官有狗古智卑狗不屬倭國自郡至
邪馬臺二千餘里計其方向當在會稽東冶之東與儋

耳相近男子皆黥面文身露紒以木綿帕頭其衣橫幅但結束相連畧無縫婦人被髮屈紒作衣如單被穿其中央貫頭衣之皆徒跣有室屋父母兄弟卧息異處以朱丹塗其身體如中國用粉也食飲用籩豆手食其死有棺無槨封土作冢始死停喪十餘日當時不食肉喪主哭泣他人就歌舞飲酒已葬舉家詣水中澡浴以如練沐其行來渡海詣中國恒使一人不梳頭不去蟣蝨衣服垢污不食肉不近婦人如喪人名之為持衰若行

者吉善共顧以生口財物若有疾病遭暴害便欲殺之
謂其持衰不謹其有所舉事云為輒灼骨為卜以占吉
凶如中國鑽龜法視火圻之兆而知之其會同坐起父
子男女無別人性嗜酒見大人致敬但搏手以當跪拜
國人多壽考或百歲或八九十大姓皆四五婦下戶或
二三婦婦人不淫不妬忌婚嫁不娶同姓男女相悅者
即為婚配婦入夫家必先跨火乃與夫相見國多珍物
有青玉真珠有如意寶珠其色青大如雞子夜則有光

云魚眼睛也其山有丹其木有柟梓豫章楸檉柹檣烏
號楓香其竹篠簞桃支有薑橘椒藁荷不知以為滋味
有黑雉有獸如牛名曰山鼠又有大蛇吞此獸蛇皮堅
不可砍其上孔乍開乍閉時或有光射中之即死無牛
馬虎豹羊鵲氣候溫暖草木冬青土地膏腴水多陸少
種禾稻紵麻蠶桑緝績冬夏皆食生菜兵有弓矢刀稍
弩矟斧戚漆皮為甲矢鏃用鐵或用骨樂有五絃琴笛
戲有碁博握槊搏搗王所都無城郭內官有十二等一

曰太德次小德次大仁次小仁次大義次小義次大禮
次小禮次大智次小智次大信次小信員無定數有軍
尼百二十人猶中國牧宰八十戶置一伊尼翼如今里
長也十伊尼翼屬一軍尼其刑法彊盜及姦皆死盜者
計贓酬物無財者沒身為奴自餘輕重或流或杖每訊
冤獄不承引者以木壓膝或張彊弓以弦鋸其項或置
小石於沸湯中令所競者探之云理曲者即手爛或置
蛇缶中令取之云曲者即螫手人頗恬靜罕爭訟少寇

盜頗敬佛法始無文字唯刻木結繩後於百濟求得佛經方有文字尤信巫覡每至正月一日必射戲飲酒其餘節與華畧同漢建武中遣使入朝自稱大夫安帝時又遣朝貢謂之倭奴靈帝光和中其國亂遞相攻伐歷年無主有女子名卑彌呼能以鬼道惑衆國人共立為王年長矣無夫壻有男弟佐之治國自為王以來少有見者以婢千人自侍唯有男子一人給飲食傳辭令居處宮室樓觀甚設常有人持兵守衛魏景初三年公孫

淵誅後卑彌呼始遣其大夫難升米牛利等詣帶方郡
求詣天子朝獻太守劉夏遣吏將送詣京師明帝詔賜
卑彌呼為親魏倭王假金印紫綬以難升米為率善中
郎將牛利為率善校尉假銀印青綬是歲明帝崩齊王
芳立明年改元正始太守弓遵遣建中校尉梯雋等奉
詔書印綬詣倭國拜假卑彌呼爵命并齎詔賜金帛錦
罽刀鏡等物卑彌呼因使上表答謝四年卑彌呼復遣
其大夫伊聲耆掖邪狗等八人上獻方物詔拜掖邪狗

等率善中郎將各假印綬六年又詔賜難升米黃幢付帶方郡假授八年太守王頌到官卑彌呼與狗奴國王卑彌弓呼交兵遣其臣載斯烏越等詣郡說相攻擊狀郡遣塞曹掾史張政等因齎詔書黃幢拜假難升米為檄告諭之卑彌呼已死大作冢徑百餘步狗葬奴婢百餘人更立男子為王國中不服更相誅殺當時殺千餘人復立卑彌呼宗女臺與為王國中乃定臺與時年十三政等以檄告諭臺與臺與遣率善中郎將掖邪狗等

二十人送政等還因詣臺修其歲貢晉泰始初復遣使
朝獻臺與死其國復立男王安帝時有倭王讚者通表
江左宋武帝永初二年詔曰倭讚遠誠宜甄可賜除授
文帝元嘉二年讚又遣其司馬曹達奉表獻方物讚死
弟珍立遣使入貢自稱使持節都督倭百濟新羅任那
秦韓慕韓六國諸軍事安東大將軍倭國王表求除正
詔除安東將軍倭國王珍又求除正倭消等十三人平
西征虜冠軍輔國將軍等號詔並聽之二十年倭國王

濟遣使奉獻復以為安東將軍倭國王二十八年加使
持節都督倭新羅任那加羅秦韓慕韓六國諸軍事安
東將軍如故并除所上三十三人職濟死子興遣使貢
獻孝武大明六年詔授興安東將軍倭國王興死弟武
立自稱使持節都督倭百濟新羅任那加羅秦韓慕韓
七國諸軍事安東大將軍倭國王順帝昇明二年遣使
上表言自昔祖禰躬擐甲冑跋涉山川不遑寧處東征
毛人五十五國西服衆夷六十一國陵平海北九十五

國王道融秦廓土遐畿累葉朝宗不愆於歲道逕百濟
裝飾船舫而句麗無道圖欲見吞臣亡考濟亡兄興並
欲大舉問罪不幸奄喪父兄使垂成之功不獲一簣今
欲練兵申父兄之志竊自假開府儀同三司其餘咸各
假授以勸忠節詔除武使持節都督倭新羅任那加羅
秦韓慕韓六國諸軍事安東大將軍倭王齊建元中除
武持節都督倭新羅任那加羅秦韓慕韓六國諸軍事
鎮東大將軍梁武即位進號征東大將軍自是迄於陳



世使命不絕隋時倭王姓阿每字多利思比孤號阿輩
雞彌阿輩雞彌華言天兒也王妻號雞彌沒官名太子
為利歌彌多弗利開皇二十年多利思比孤遣使詣闕
上令所司訪其風俗使者言倭王以天為兄以日為弟
天明時出聽政跣趺坐日出便停理務云委我弟文帝
曰此大無義理訓令改之大業二年多利思比孤復遣
使朝貢使者云聞海西菩薩天子重興佛法故遣朝拜
兼有沙門數十人來學竺乾道國書曰日出處天子致

書日沒處天子無恙云云煬帝覽之不悅謂鴻臚卿曰
蠻夷書有無禮者勿復以聞明年帝遣文林郎裴清使
其國渡百濟行至竹島南望耽羅國經都師麻國迺在
大海中又東至一支國又至竹斯國又東至秦王國其
人同於華夏以為夷洲疑不能明也又經十餘國達於
海岸自竹斯國以來皆附庸於倭倭王遣小德阿輩臺
從數百人設儀仗鳴鼓角來迎後十日又遣大禮歌多
毗從二百餘騎郊勞既至彼都其王與清相見設燕饗食

以遣復令使者隨清來貢方物先時其王冠服仍其國俗至是始賜與衣冠乃以綵錦為冠飾裳皆施襪音綴以金玉云唐貞觀五年遣新州刺史高仁表持節撫之浮海數月方至仁表無綏撫之才與其王爭禮不宣朝命而還倭國之南復有侏儒國人長三四尺又南有黑齒國裸國船行可一年至使驛所傳極於此矣

夫餘

夫餘後漢通焉國在元菟北千里南與高句麗東與挹

婁西與鮮卑接北有弱水地方二千里初北夷索離國

王出行

索或作橐音度洛反

其侍兒於後倭身王還欲殺之侍兒

曰前見天上有氣大如雞子來降我因以有身王囚之

後遂生男令置於豕牢豕以口氣噓之不死復徙於馬

闌

闌即欄也

馬亦如之王以為神乃聽母收養名曰東明東

明長而善射王忌其猛復欲殺之東明奔走南至淹淲

水

今高麗中有蓋斯水疑此水是也

以弓擊水魚鼈皆聚浮水上東明

乘之得度因至夫餘而王之夫餘地多山陵廣澤於東

夷之域最為平敞其民土著當漢魏時有戶八萬土地
宜五穀不生五果其人麤大性彊勇謹厚不冠鈔王以
圓柵為城有宮室倉庫牢獄官名以六畜稱之有馬加
牛加豬加狗加犬使犬使者使者邑落有豪民名下戶
皆為奴僕諸加別主四出道大者主數千家小者數百
家食飲皆用俎豆會同拜爵洗爵揖讓升降以臘月祭
天國中大會連日飲食歌舞名曰迎鼓於是時斷刑獄
解囚徒在國衣尚白白布大袂袍袴履革踏出國則尚

繒繡錦罽大人加狐狸執白黑貂之裘以金銀飾帽譯人傳辭皆跪手據地竊語用刑嚴急殺人者死沒其家人為奴婢竊盜一責十二男女淫婦人妬皆殺之尤憎妬婦既殺復尸之國南山上至腐爛女家欲得輸牛馬乃與之兄死妻嫂與匈奴同俗其國善養牲出名馬赤玉貂獠美珠珠大者如酸棗以弓矢刀矛為兵家家自有鎧仗行道晝夜無老幼皆歌通日聲不絕有軍事亦祭天殺牛觀蹄以占吉凶蹄解者為凶合者為吉有敵

諸加自戰下戶俱擔糧飲食之其死夏月皆用冰殺人

狗葬多者至百數厚葬有槨無棺

其居喪男女皆純白婦人著布面衣去環

珮大抵與中國同也

其王葬則用玉匣漢朝常豫以玉匣付元菟

郡王死則迎取以葬焉

公孫淵誅後元菟庫猶有玉匣一具魏晉時夫餘庫有玉璧珪

璜數代之物傳世以為寶又有印文言藏王之印國有故城名藏城蓋本藏地故世藏其印也

建武二

十五年夫餘王遣使奉貢光武厚答報之於是使命歲

通安帝永初五年夫餘王始將步騎七八千人寇鈔樂

浪殺傷吏氏後復歸附永寧元年乃遣嗣子尉仇台詣

闕貢獻天子賜尉仇台印綬金綵順帝永和初其王來朝京師帝作黃門鼓吹角觝戲以遣之桓帝延熹四年遣使朝獻永康元年王夫台將二萬餘人寇元菟元菟太守公孫域擊破之斬首千餘級靈帝熹平三年復奉章貢獻夫餘本属元菟漢末公孫度雄張海東威服外夷王尉仇台求属遼東時高句麗鮮卑盛彊度以夫餘在二虜之間以宗女妻尉仇台冀得其力尉仇台死王位居立位居死王麻余立魏世歲歲朝貢麻余死子依

慮立時年六歲晉武帝時頻獻方物太康六年為慕容
廆所襲破依慮自殺子弟走保沃沮武帝詔求其後為
之復國且以護東夷校尉鮮于嬰不救夫餘使至敗亡
詔免嬰官以何龕代之明年夫餘王依羅遣使詣龕求
率見人還復舊國仍請援龕上列遣督郵賈沈以兵送
之廆又要之於路沈與戰大破之廆衆退依羅得復國
自後頻為廆掠其種人賣於中國帝愍之又發詔以官
物贖還下司冀二司禁市夫餘之口自後無聞

高句麗

高句麗後漢時通焉其先出於夫餘夫餘王嘗得河伯女因閉於室內為日所照引身避日日影逐之既而有孕生一卵大如五升夫餘王棄之與犬犬不食與豕豕不食棄於路牛馬避之棄於野衆鳥以毛茹之王剖之不能破遂還其母母以物裹置暖處有一男破而出及長字之曰朱蒙其俗言朱蒙者善射也夫餘人以朱蒙非人所生請除之王不聽命之養馬朱蒙私試知有善

惡駿者減食令瘦駑者善養令肥夫餘王以肥者自乘
以瘦者給朱蒙後狩于田以朱蒙善射給之一矢朱蒙
雖一矢殪獸甚多夫餘之臣又謀殺之其母以告朱蒙
朱蒙乃與馬遵等二人東南走中道遇一大水欲濟無
梁夫餘人追之甚急朱蒙告水曰我是日子河伯外孫
今追兵垂及如何得濟於是魚鼈為之成橋朱蒙得度
魚鼈乃解追騎不度朱蒙遂至普述水遇見三人一著
麻衣一著衲衣一著水藻衣與朱蒙至紇升骨城遂居

焉號曰高句麗因以高為氏其地在遼東之東千里南
與朝鮮濊貊東與沃沮北與夫餘接地方二千里多大
山深谷無原澤人隨山谷以為居食澗水無良田力作
不足以自資故其俗節於飲食而好治宮室句麗既夫
餘別種故言語法則多同而跪拜曳一脚徒步皆走凡
有五族有消奴部絕奴部順奴部灌奴部桂婁部唐時高麗
五部一曰內部一名黃部即桂婁部也二曰北部一名
後部即絕奴部也三曰東部一名左部即順奴部也四
曰南部一名前部即灌奴部也五
曰西部一名右部即消奴部也
本消奴部為王稍微

弱後桂婁部代之其官有相加對盧沛者古雛大加古

大加掌賓客之官如中國鴻臚也

主簿優台使者皂衣先人孝武帝滅

朝鮮以高句麗為縣使屬元菟賜以衣幘朝服鼓吹伎

人常從元菟郡受之後稍驕恣不復詣郡但於東界築

小城以受之遂名其城為幘溝淩

高麗謂城為溝淩言於此城受漢衣幘故

呼為幘溝淩也

其置官有對盧則不置沛者有沛者則不置沛

盧王之宗族其大加皆稱古雛加消奴部本國主後雖

不為王適統大人得稱古雛加亦得立宗廟祠靈星社

稷絕奴部世與王婚加古雛之號諸大加亦自置使者
皂衣先人名皆達於王如卿大夫之家臣會同坐起不
得與王家使者皂衣先人同列其國中大家不佃作坐
食者萬餘口下戶遠擔米糧魚鹽供給之其民喜歌舞
國中邑落暮夜男女羣聚相就歌戲無大倉庫家家自
有小倉名之為桴京其人潔清自意好祠社稷鬼神零
星

漢書音義曰龍星左角曰天田則農祥也辰見祀以
牛號曰零星風俗通曰辰之神為靈星以辰日祀於

東方以十月祭天國人大會名曰東盟其國東有大穴

號隧神亦以十月迎而祭之其公會衣服皆錦繡金銀
以為飾大加主簿皆著幘如冠幘而無後其小加著折
風形如弁無牢獄有罪諸加評議便殺之沒入妻子為
奴婢其俗作婚姻言語已定女家作小屋於大屋後名
壻屋壻暮至女家戶外自名拜跪乞得就女宿如是者
再三女父母乃聽使就小屋中宿傍頓錢帛至生子已
長大乃將婦歸家其俗淫男女已嫁娶便稍作送終之
衣厚葬金銀財幣盡於送死積石為封列種松柏父母

及夫喪其服制同於華夏兄弟則限以三月兵器有甲
弩弓箭戟稍矛鉞樂有五絃琴箏箏箎橫吹簫鼓之屬
賦稅則絹布及粟隨其所有量貧富等差輸之其馬皆
小便登山國人有氣力習戰鬪沃沮東濊皆屬焉句麗
一名貊有別種依小水為居因名曰小水貊出好弓所
謂貊弓是也魏氏春秋曰遼東郡西安平縣北有小水南流入海句麗別種因名之小水貊王
莽初發高句麗兵以伐匈奴不欲行疆迫遣之皆亡出
塞為寇盜遼西大尹田譚追擊之為所殺州郡縣歸咎

於句麗侯騶嚴尤奏言貊人犯法罪不起於騶且宜安
慰今猥被之大罪恐其遂反莽不聽詔尤擊之尤誘期
句麗侯騶至而斬之傳送其首詣長安莽大說布告天
下更名高句麗王為下句麗侯於是貊人寇邊愈甚建
武八年高句麗遣使朝貢光武復其王號二十三年冬
句麗蠶支落大加戴升等萬餘口詣樂浪內屬二十五
年春句麗寇右北平漁陽上谷太原而遼東太守祭彤
以恩信招之皆復款塞後句麗王宮生而開目能視國

人惡之及長勇壯數犯邊境和帝元興元年春復入遼

東寇掠六縣太守耿夔擊破之斬其渠帥安帝永初五

年宮遣使貢獻求屬元菟元初五年復與濊貊寇元菟

攻華麗城

華麗縣屬樂浪郡也

建光元年春幽州刺史馮煥元菟

太守姚光遼東太守蔡諷等將兵出塞擊之捕斬濊貊

渠帥獲兵馬財物官乃遣嗣子遂成將二千餘人逆光

等遣使詐降光等信之遂成因據險阨以遮大軍而潛

遣三千人攻元菟遼東焚城郭殺傷二千餘人於是發

廣陽漁陽右北平涿郡屬國三千餘騎同救之而貊人

已去夏復與遼東鮮卑八千餘人攻遼隊

縣名屬遼東郡也

殺

畧吏民蔡諷等追擊於新昌戰歿功曹耿耗兵曹掾龍

端兵馬掾公孫酺以身扞諷俱歿於陣死者百餘人馬

宮遂率馬韓濊貊數千騎圍元菟夫餘王遣子尉仇台

將二萬餘人與州郡并力破之斬首五百餘級是歲宮

死子遂成立姚光上言欲因其喪發兵擊之議者皆以

為可許尚書陳忠曰宮前桀黠光不能討死而擊之非

義也宜遣弔問因責讓前罪赦不加誅取其後善安帝

從之明年遂成還漢生口詣元菟降遂成死子伯固立

其後滅貊率服東垂少事順帝陽嘉元年置元菟郡屯

田六部質桓之間復犯遼東西安平殺帶方令

郡國志
西安平

帶方縣並
屬遼東郡掠得樂浪太守妻子建寧二年元菟太守耿

臨討之斬首數百級伯固降服乞屬元菟云公孫度之

雄海東也伯固遣大加優台主簿先人等助度擊富山

賊破之伯固死有二子長子拔奇小子伊夷模拔奇不

肖國人共立伊夷模為王自伯固時數寇遼東又受亡
胡五百餘家獻帝建安中公孫康出軍擊之破其國焚
燒邑落拔竒怨為兄而不得立與消奴加各將下戶三
萬餘口詣康降還住沸流水降胡亦叛伊夷模伊夷模
更作新國於丸都山下拔竒遂往遼東有子留句麗國
古雛加駁位居是也其後復擊元菟元菟與遼東合擊
大破之伊夷模無子淫灌奴部生子名位宮伊夷模死
立以為王國人以其曾祖名宮生能開目視人長而凶

虐國見殘破今王生墮地亦能開目視人必亦如其酷
暴國中以為患句麗謂相似為位以似其祖故名之為
位宮焉位宮有勇力便鞍馬善獵射魏明帝景初二年
太尉司馬懿率衆討公孫淵位宮遣主簿大加將數千
人助軍齊王正始三年位宮寇西安平五年幽州刺史
母邱儉將萬人出元菟討之戰於沸流位宮敗走儉追
至潁峴縣車束馬登九都山屠其所都斬首虜萬餘級
六年儉復討之位宮輕將諸加奔沃沮山儉使元菟太

守追之絕沃沮千餘里到肅慎南界刻石紀功又刊丸
都山銘不耐城而還其後復通中國晉永嘉之亂鮮卑
慕容廆據昌黎大棘城晉授廆北平州刺史位宮元孫
乙弗利頻寇遼東廆不能制乙弗利死子釗立慕容廆
子皝伐之入自南陝戰於木底大破釗軍追至丸都釗
單馬奔竄皝掘釗父墓掠其母妻珍寶男女五萬餘口
焚其室毀丸都城而去釗後為百濟所殺及晉孝武帝
太元十年句麗攻遼東元菟郡後燕慕容垂遣其弟農

伐句麗復二郡垂子寶以句麗王安為平州牧封遼東
帶方二國王始置長史司馬參軍官後畧有遼東郡安
帝義熙九年高麗王璉遣長史高翼奉表獻赭白馬詔
以璉為使持節都督營州諸軍事征東將軍樂浪公句
麗王宋武帝踐阼加璉鎮東大將軍餘如故三年加璉
散騎常侍增督平州諸軍事少帝景平二年璉遣長史
馬婁等來獻方物詔遣謁者朱邵伯王邵子等慰勞之
後魏太武初璉復遣使者詣東安府通表代都并請國

諱太祖嘉其誠款詔下帝系名諱於其國使員外李敖
拜璉為都督遼海諸軍事征東將軍領東夷中即將遼
東郡公高句麗王自後貢使相尋宋文帝元嘉十三年
魏太武滅燕燕主馮弘奔句麗北豐城表求迎接文帝
遣將軍王白駒趙次興迎之并令句麗資遣璉不欲弘
南乃遣其將孫漱高仇等襲弘殺之白駒等率所領七
千餘人生禽漱殺仇等二人璉以白駒等專殺遣使執
送之文帝以遠國不欲違其意下白駒等獄既而原之

是歲太武亦遣散騎常侍封撥詔璉生送弘璉既殺弘
太武怒將討之樂平王丕等議待後舉乃止明年文帝
欲侵魏詔璉送馬璉獻八百匹於宋孝武孝建二年璉
遣長史董騰奉表慰國哀再周并獻方物大明二年又
獻肅慎楛矢石弩七年詔進璉為車騎大將軍開府儀
同三司餘官如故明帝泰始初後廢帝元徽中使命不
絕魏文明太后時以獻文六宮未備勅璉令薦其女璉
表稱女已出適求以弟女應旨太后遣近臣送幣至境

璉復上書妄稱女死太后惡其矯拒詔切責之將問罪
焉會獻文殂乃止孝文時璉貢獻踰前其報賜亦稍加
益時光州於海中得璉遣詣齊使餘奴等送關孝文詔
責曰蕭道成親弑其君竊號江左朕方欲興滅國於舊
邦繼絕世於劉氏而卿乃越境外嚮交通篡賊守藩之
節當如是邪太和十五年璉死年百餘歲孝文冊贈車
騎大將軍太傅遼東郡公高句麗王謚曰康又遣大鴻
臚拜璉孫雲使持節都督遼海諸軍事征東將軍領護

東夷校尉中郎將遼東郡公高句麗王賜衣冠服物車
旗之飾又詔雲遣世子入朝雲上書辭以子疾遣其從
叔升于隨使詣闕貢獻帝嚴責之自此歲致方物於魏
然亦間使建鄴齊武帝永明中高麗使至服窮袴冠折
風中書郎王融戲之曰服之不衷身之災也頭上定是
何物答曰此即古弁之遺像也廢帝隆昌中以雲為使
持節散騎常侍都督營平二州征東大將軍樂浪公高
麗王魏雖知其兩屬然不欲顯聞之也梁武帝即位進

雲車騎大將軍天監七年詔為撫軍大將軍開府儀同
三司持節常侍都督王並如故十一年十五年累遣使
貢獻十七年雲死時魏孝明帝神龜元年也靈太后冊
贈雲車騎大將軍領護東夷校尉遼東郡公高麗王又
拜其世子安為鎮東將軍領護東夷校尉遼東郡公高
麗王梁普通元年武帝以安纂襲封爵持節都督營平
二州諸軍事寧東將軍是歲魏光州又於海中執得梁
所授安爵命及衣冠劔珮并使人江法盛等送京師靈

太后亦不深責之也安在位九年卒字延立遣使修貢
於梁梁武以延襲爵中大通四年六年大同元年七年
各獻方物延在位二十三年卒延之初立也魏室大亂
至永熙初始得通使孝武詔加延使持節散騎常侍車
騎大將軍領護東夷校尉遼東郡公高句麗王東魏天
平中詔加延侍中車騎將軍餘如故延卒子成立訖於
武定已來其貢使無歲不至大統十二年遣使至西魏
朝貢及齊受東魏禪之歲遣使朝貢於齊齊文宣加成

使持節侍中驃騎大將軍領東夷校尉遼東郡公高麗
王如故天保三年文宣至營州使博陵崔柳使於高麗
求魏末流人勅柳曰若不從者以便宜從事及至不見
許柳張目叱之奮拳擊成墜於牀下成左右崔息不敢
動乃謝服柳以五千戶反命成死子湯立乾明元年齊
廢帝以湯為使持節領東夷校尉遼東郡公高麗王周
建德六年湯遣使至周武帝以湯為上開府儀同大將
軍遼東郡公遼東王隋文帝受禪湯遣使詣闕進授大

將軍改封高麗王湯所遣使人云其國自東晉以後徙

居平壤城

即漢樂浪郡王險城

亦曰長安城隨山屈曲南臨湏水

城內唯積倉儲器械寇至方入固守王別為宮於其側
不恒居之其外復有國內城及漢城亦別都也國中呼
為三京復有遼東元菟等數十城皆置官司以相統攝

其地後漢時方二千里至魏及南北朝時漸狹纔千餘里至隋時漸大東西六千里

又云其建官

與前世不同見官有九等其一曰吐梓才沒反舊名大對

盧總知國事次曰太太兄次鬱折之悅反華言主簿次小

大夫人使者次皂衣頭大兄東夷相傳所謂皂衣先人者也以前五官掌機密謀政事徵發兵馬選授官爵次大使者次大兄次收位使者次上位使者次小兄次諸兄次過節次不過節次先人又有古雛加掌賓客以大夫使者為之又有國子博士太學博士舍人通事典書客皆以小兄以上為之又其諸大城置僣內屋反薩比都督諸城置處間近支比刺史亦謂之道使其武官曰大摸達比衛將軍以皂衣頭大兄以上為之次末客比中

郎將以大兄以上為之其次領千人以下各有差等國中書籍有五經三史三國志晉陽秋玉篇字統字林之屬及隋平陳後湯大懼陳兵積穀為守拒之策開皇十七年文帝賜璽書責湯雖稱藩附誠節未純謂其驅迫韎韐禁固契丹殺害邊人志圖不軌湯得書惶恐將表陳謝會病卒子元嗣立文帝使拜元為上開府儀同三司襲爵遼東公賜服一襲元奉表謝恩并賀祥瑞因請王爵帝優爵為王明年元率韎韐萬餘騎寇遼西營州

總管韋世冲擊走之帝大怒命漢王諒為元帥總水陸討之下詔黜其爵位時餽運不繼六軍乏食帥出臨渝關復遇疾疫王師不振及次遼水元亦惶懼遣使謝罪上表稱遼東糞土臣元云云於是罷兵待之如初元亦歲遣朝貢煬帝嗣位天下全盛高昌王突厥啟民可汗並親詣闕貢獻於是徵元入朝元懼蕃禮頗闕大業七年帝將討元罪車駕度遼水止營於遼東地分道出師各頓兵於其城下高麗出戰多不利皆嬰城固守帝

令諸軍攻之又勅諸將高麗若降即宜撫納不得縱兵
城將陷賊輒言請降諸將奉旨不敢赴機先令馳奏比
報至賊守禦亦備復出拒戰於此者再三帝不悟由是
食盡師老轉輸不繼諸軍敗績還者千餘人而已是行
也唯於遼水西拔賊武厲邏置遼東郡及通定鎮而還
九年帝復親征勅諸軍以便宜從事諸將分道攻城賊
勢日蹙會楊元感作亂反書至帝大懼即日六軍並還
兵部侍郎斛斯政亡入高麗高麗具知事實盡銳來追

殺軍多敗十年又發天下兵會盜賊蜂起所在阻絕軍多失期少至至遼水又屬飢饉六軍遞相掠奪復多疫疾自黃龍以東骸骨相屬止泊之處軍人皆積屍以禦風雨死者十八九高麗亦困弊於守禦遣使乞降因送斛斯政以贖罪帝許之頓於懷遠鎮受其降款仍以俘囚軍實歸于京師以高麗使親告太廟因拘留之仍徵元入朝元竟不至帝更圖後舉會天下喪亂遂不復行隋末元死其異母弟建武嗣立唐武德初再遣使入朝太

宗平突厥禽頡利威加海表建武懼遣使上封域圖詔
遣廣州司馬長孫師臨瘞隋戰士遺皆毀高麗所立京
觀建武恐中國加兵乃築長城千里東北首扶餘西南
屬之海久之遣其太子桓權入貢方物其後建武為其
東部大人蓋蘇文所殺而立建武之弟子藏為王貞觀
十八年太宗命刑部尚書張亮為平壤道行軍大總管
自萊州泛海趣平壤又以特進李勣為遼東道行軍大
總管趣遼東討蓋蘇文明年六飛親征渡遼拔數城而

還高宗總章初遣司空李勣伐高麗破平壤城時蓋蘇文已死禽其王高藏及蓋蘇文之子男建等平其國下城百七十戶六十九萬七千咸亨初其餘類有酋長劍牟岑者率叛人立高藏外孫安舜為王詔左衛大將軍高侃討平之自是餘衆不能自保散投新羅靺鞨等國其土地盡入于靺鞨高氏君長遂絕

東沃沮

北沃沮附

東沃沮後漢通焉其國在高句麗蓋馬大山之東

蓋馬縣名

屬元
菟郡

東濱大海北與挹婁夫餘南與濊貊接其地形東
西狹南北長可折方千里無大君王世世邑落各有長
帥其言語與句麗大同時或小異漢初燕亡人衛滿王
朝鮮時沃沮皆屬焉孝武帝元封二年伐朝鮮殺滿孫
右渠分其地為四郡以沃沮城為元菟郡後為夷貊所
侵徙郡句麗西北所謂元菟故府是也沃沮還屬樂浪
漢以土地廣遠在單單大嶺之東分置東部都尉治不
耐城別主領東七縣時沃沮亦皆為縣東漢光武六年

省遼郡都尉東部都尉由此罷其後皆以其縣中渠帥
為縣侯不耐華麗沮沮諸縣皆為侯國夷狄更相侵伐
唯不耐濊侯後漢末猶置功曹主簿諸曹皆以濊民作
之沃沮諸邑落渠帥皆自稱三老則故縣國之制也國
小逼於大國之間遂臣屬句麗句麗復置其國中大人
為使者使相主領又使大加統之責其租稅貂布魚鹽
海中食物千里擔負致之又送其美女以為婢妾遇之
如奴僕其土地肥美背山向海宜五穀善田種人性質

直彊勇便持矛步戰食飲居處衣服禮節有似句麗其
葬作大木槨長十餘丈開一頭作戶新死者皆假埋之
才使覆形皮肉盡乃取骨置槨中舉家皆共一槨刻木
如生形隨死者為數又有瓦甕置米其中編縣之於槨
戶邊母邱儉討高麗王位宮位宮奔沃沮儉遂進師擊
之沃沮邑落皆為所破斬獲首虜三千餘級位宮奔北
沃沮北沃沮一名置溝婁去南沃沮八百餘里其南北
沃沮皆與挹婁接挹婁喜乘船寇鈔北沃沮畏之夏月

恒在山巖深穴中為守備冬月冰凍船道不通乃下居村落元菟太守王頌追討位宮盡其東界問其耆老海東復有人否耆老言國人常乘船捕魚遭風見吹數十日東得一島上有人言語不相曉其俗常以七月取童女沈海又言有一國亦在海中純女無男人或傳其國有神井女子窺之輒孕又說得一布衣從海中浮出其身如中國人衣其兩袖長三丈又得一破船隨波在海岸邊有一人項中復有面生得之與語不相通不食而

死其城皆在沃沮東大海中

挹婁

挹婁魏時通焉即古肅慎之國也在夫餘東北千餘里東濱大海南與北沃沮接不知其北所極土地多山險其人形似夫餘而言語不與句麗夫餘同有五穀麻布出赤玉好貂無君長其邑落各有大人無文墨以言語為約處於山林之間土氣極寒常為穴居以深為貴大家至接九梯好養豕食其肉衣其皮冬以豕膏塗身厚

數分以禦風寒無井竈作瓦甬受四五升以食坐則箕踞以足挾肉而啖之得凍肉坐其上令暖土無鹽鐵燒木作灰灌取汁而食之俗皆編髮裸袒以布作襜徑尺餘蔽其前後其人不潔作溷於中圜之而居將嫁娶男以毛羽挿女頭女和則持歸然後致禮聘之婦貞而女淫貴壯而賤老死者其日即葬之於野交木作槨殺豬積其上以為死者之糧性凶悍以無憂哀相尚父母死男女不哭泣哭者謂之不壯相盜竊無多少皆殺之雖

野處而不相犯有石弩皮骨之甲其國東北有山出石其利入鐵將取之必先祈神人衆雖少而多勇力處山險又善射發必中人目弓長四尺力如弩矢用楮長一尺八寸青石為鏃鏃皆施毒中人即死隣國畏其弓矢卒不能服也便乘船好寇盜隣國患之東夷飲食類皆用俎豆唯挹婁獨無法俗最無綱紀者也周武王時獻其楛矢及周公輔成王復遣使入貢自漢已來臣屬夫餘夫餘責其租稅太重魏文帝黃初中叛之陳留王景

元末來貢楛矢石弩弓甲貂皮之屬詔賜其王傳雞錦
罽綿帛晉武帝元康初復來貢獻元帝中興又詣江左
貢其石弩至成帝時通貢於石虎四年方達於鄴虎問
其使人由何而至答曰每候牛馬向西南卧者三年矣
是知有大國所在故來焉

勿吉 一曰靺鞨

勿吉後魏通焉在高句麗北一曰靺鞨邑落各自有長
不相總一其人勁悍於東夷最彊言語獨異常輕豆莫

婁等諸國諸國亦患之去洛陽五千里自和龍北二百餘里有善玉山山北行十三日至祁黎山又北行七日至洛瓌水水廣里餘又北行十五日至太岳魯水又東北行十八日到其國國有大水濶三里餘名速末水其部類凡有七種其一號栗末部與高麗接勝兵數千多驍武每寇高麗其二汨咄部在栗末北勝兵七千其三安車骨部在汨咄東北其四拂涅部在汨咄東其五號室部在拂涅東其六黑水部在安車西北其七白山部

在粟末東南勝兵並不過三千而黑水部尤為勁健自拂涅以東矢皆石鏃即古肅慎地也東夷中為彊國所居多依山水渠帥曰大莫拂瞞咄國南有從太山者華言太皇俗甚敬畏之人不得山上洩汗行經山者以物盛去上有熊羆豹狼皆不害人亦不敢殺地卑濕築土如堤鑿穴以居開口向上以梯出入其國無牛有車馬則步推相與偶耕土多粟麥糝菜則有葵水氣鹹生鹽於木皮之上亦有鹽池其畜多猪無羊嚼米為酒飲之

亦醉婚嫁婦人服布裙男子衣猪犬皮裘頭挿虎豹尾俗以溺洗手面於諸夷最為不潔初婚之夕男就女家既成禮而後歸其妻外淫人有告其夫夫輒殺妻殺之而悔必殺告者由是姦淫事終不發人皆善射以射獵為業角弓長三尺箭長尺二寸常以七八月造毒藥傳矢以射禽獸中者立死者煮毒藥藥氣亦能殺人其父母春夏死立埋之冢上作屋令不雨濕若秋冬死以其尸捕貂貂食其肉多得之後魏孝文延興中其王遣乙力

支朝獻太和初又貢馬五百匹乙力支稱初發其國乘

船沂難河西上至大沱河

沱音麗

沈船於水南出陸行度

洛孤水從契丹西界達和龍自云其國先破高麗十落

密共百濟謀從水道并力取高麗遣乙力支奉使大國

謀其可否詔勅三國同是藩附宜共和順勿相侵擾乙

力支乃還從其來道取得本船汎達其國九年復遣使

侯尼支來朝明年復入貢其旁有大莫盧國覆鍾國莫

多回國庫婁國素和國具弗伏國匹黎爾國拔大何國

郁羽陵國庫直真國魯婁國羽真侯國前後各遣使朝
獻太和十三年勿吉復遣使貢楛矢方物於京師十七
年又遣使人婆非等五百餘人朝貢景明四年復遣使
侯力歸朝貢自此迄于正光貢使相尋爾後中國紛擾
頗或不至東魏及齊間有朝焉隋開皇初靺鞨國有使
來獻謂即勿吉也勿吉靺鞨其音相近文帝詔其使曰朕聞彼土
人勇今來實副朕懷朕視爾等如子爾宜敬朕如父對
曰臣等僻處一方聞內國有聖人故來朝拜既親奉聖

顏願長為奴僕其國西北與契丹接每相劫掠後因其使來文帝誠之使勿相攻擊使者謝罪文帝因厚勞之令宴飲於前使者與其徒皆起舞曲折多戰鬪之容上顧謂侍臣曰天地間乃有此物常作用兵意然其國與隋懸隔唯粟末白山為近煬帝初與高麗戰頻敗其衆渠帥突地稽率其部來降拜右光祿大夫居之柳城與邊人來往悅中國風俗請被冠帶帝嘉之賜以錦綺而褒寵之及遼東之役突地稽率其徒以從每有戰功賞

賜甚厚十三年從幸江都尋放還柳城李密遣兵邀之
僅而得免至高陽沒於王須拔未幾遁歸于羅藝唐初
靺鞨頻遣使貢獻詳攷傳記挹婁勿吉靺鞨皆肅慎氏
之後裔云

扶桑

女國附

扶桑南齊時聞焉廢帝永元初其國有沙門慧深來至
荊州說云扶桑在大漢國東二萬餘里地在中國之東
其土多扶桑木故以為名扶桑葉似桐初生如笋國人

食之實如梨而赤績其皮為布以為衣亦以為錦作版屋無城郭有文字以扶桑皮為紙無兵甲不攻戰其國法有南北獄若有犯輕罪者入南獄罪重者入北獄有赦則放南獄不赦北獄在北獄者男女相配生男八歲為奴生女九歲為婢犯罪之身至死不出貴人有罪國人大會坐罪人於地對之宴飲分訣若死別焉以灰繞之其一重則一身屏退二重則及子孫三重者則及七世名國王為乙祁貴人第一者為對盧第二者為小對

盧第三者為納咄沙國王出行有鼓角導從其衣色隨年更改甲乙年青丙丁年赤戊己年黃庚辛年白壬癸年黑有牛角甚長以角載物至勝二十斛有馬車牛車鹿車國人養鹿如中國畜牛以乳為酪有赤黎經年不壞多蒲桃其地無鐵有銅不貴金銀市無租估其婚娶法則壻往女家門外作屋晨夕灑掃經年而女不悅即驅之相悅乃成婚婚禮大抵與中國同親喪七日不食祖父母喪五日不食兄弟伯叔姑姊妹三日不食設坐

為神像朝夕拜奠不制衰經嗣王立三年不親國事其俗舊無佛法宋孝武大明二年罽賓國嘗有比丘五人游行其國流通佛法經像教令出家風俗遂改慧深又云扶桑東千餘里有女國容貌端正色甚潔白身體有毛髮長委地至二三月競入水則妊娠六七月產子女人胷前無乳頂後生毛根白毛中有汁以乳子百日能行三四年則成人矣見人驚避偏畏丈夫食鹹草如禽獸鹹草葉如邪蒿而氣香味鹹梁天監六年有晉安人

度海為風所飄至一島登岸有人居止則如中國而言
語不可曉男則人身狗頭其聲如吠其食有小豆其衣
如布築土為牆其形圓其戶如竇云

文身

大漢附

文身梁時通焉在倭國東北七千餘里人體有文如獸
其額上有三文文大直者貴文小曲者賤土俗歡樂物
豐而賤行客不齎糧有屋宇無城郭國王所居飾以金
銀珍麗繞屋為塹廣一丈實以水銀雨則流于水銀之

上市用珍寶又有大漢國在文身東五千餘里無兵戈
不攻戰風俗並與文身同而言語異

流求

流求隋時通焉其國居海島當建安郡東水行五日而
至土多山洞其王姓歡斯氏名渴刺兜不知其由來有
國數焉彼土人呼之為可老羊妻曰多拔茶所居曰波
羅檀洞塹柵三重環以流水樹棘為藩王所居舍其大
一十六間雕刻禽獸多闢鏤樹似橘而葉密條纖如髮

之下垂國有四五帥統諸洞洞有小王往往有村村有鳥了帥並以善戰者為之自相樹立主一村之事男女皆以白紵繩纏髮從項後盤繞至額其男子用鳥羽為冠裝以珠貝飾以赤毛形裝不同婦人以羅紋白布為帽其形方正織鬬鏤皮并雜毛以為衣製裁不一綴毛垂羅為飾雜色相閒下垂小貝其聲如珮綴璫施釧懸珠於頸織藤為笠飾以毛羽有刀稍弓箭劍鉞之屬其處少鐵刀皆薄小多以骨角輔助之編紵為甲或用熊

豹皮王乘木獸令左右舁之而導從不過十數人小王乘机鏤為獸形國人好相攻擊人皆驍健善走難死耐瘡諸洞各為部隊不相救助兩軍相當勇者三五人出前跳譟交言相罵因相擊射如其不勝一軍皆走遣人致謝即共和解收取鬪死者聚而食之仍以髑髏將向王所王則賜之以冠便為隊帥無賦斂有事則均稅用刑亦無常準皆臨事科決犯罪皆斷於鳥了帥不伏則上請於王王令臣下共議定之獄無枷鎖唯用繩縛決

死刑以鐵錐大如筋長尺餘鑽頂殺之輕罪用杖俗無
文字望月虧盈以紀時節草木榮枯以為年歲人深目
長鼻類於胡亦有小慧無君臣上下之節拜伏之禮父
子同牀而寢男子拔去髭須身上有毛處皆除去婦人
以墨點手為蟲蛇之文嫁娶以酒肴珠貝為聘或男女
相悅便相配偶婦人產乳必食子衣產後以火自炙令
汗出五日便平復以木槽中暴海水為鹽木汁為酢米
麵為酒其味甚薄食皆用手遇有異味先進尊者凡有

宴會執酒者必待呼名而後飲上王酒者亦呼王名後
銜盃共飲頗同突厥歌呼蹋蹄一人唱衆人和音頗哀
怨扶女子上膊搖手而舞其死者氣將絕舉至庭前親
賓哭泣相弔浴其屍以布帛縛纏之裹以葦席擲土而
殯上不起墳子為父者數月不食肉其南境風俗少異
人有死者邑里共食之有熊豺狼尤多猪雞無羊牛驢
馬厥田良沃先以火燒而引水灌之持一鍤以石為刃
長尺餘闊數寸而墾之宜稻粱禾黍麻豆赤豆黑豆

等木有楓栝樟松楸楠枌梓竹藤果藥同於江表風土
氣候與嶺南相類俗事山海之神祭以肴酒戰鬪殺人
便將所殺人祭其神或依茂樹起小屋或懸髑髏於樹
上以箭射之或累石繫幡以為神主王之所居壁下多
聚髑髏以為佳人間門戶上必安獸頭骨角隋大業元
年海師何蠻等每春秋二時天清風靜東望依俛似有
煙霧之氣亦不知幾千里煬帝令羽騎尉朱寬入海求
訪異俗得何蠻言遂與蠻俱往同到流求國言不通掠

一人而反明年復令寬慰撫之不從寬取其布甲而歸
時倭國使來朝見之曰此夷邪久國人所用也帝遣虎
賁郎將陳稜朝請大夫張鎮州率兵自義安今潮陽郡浮海
擊之至高華嶼又東行二日至鼃鼃嶼又一日便至流
求初稜將南方諸國人從軍有崑崙人頗解其語遣喻
降之流求不聽拒逆官軍稜擊走之進至其都頻戰皆
敗毀其宮室虜其男女數千人而還自是遂絕

閩粵

閩粵王無諸及粵東海王搖其先皆粵王句踐之後也
姓駒氏秦并天下廢為君長以其地為閩中郡及諸侯

畔秦無諸搖率粵歸番陽令吳芮所謂番君者也

吳芮號也

番音蒲從諸侯滅秦當是時項王主命不王也

主號命諸侯不

王無諸
搖等也

以故不佐楚漢擊項籍無諸搖帥粵人助漢漢五

年復立無諸為閩粵王王閩中故地都冶

地名即侯官縣是也治音

弋者反

孝惠三年舉高帝時粵功曰閩君搖功多其民便

附廼立搖為東海王都東甌世號曰東甌王后數世孝

景三年吳王濞反欲從閩粵

招粵令從也

閩粵未肯行獨東

甌從及吳破東甌受漢購殺吳王丹徒以故得不誅吳
王子駒亡走閩粵怨東甌殺其父常勸閩粵擊東甌建
元三年閩粗發兵圍東甌東甌使人告急天子天子問
太尉田蚡蚡對曰粗人相攻擊固其常不足以煩中國
往救也中大夫嚴助詰蚡言當救天子遣助發會稽郡
兵浮海救之漢兵未至閩粗引兵去東粗請舉國徙中
國乃悉與衆處江淮之間六年閩粗擊南粗南粗守天

子約不敢擅發兵而以聞上遣大行王恢出豫章大司
農韓安國出會稽皆為將軍兵未踰領閩粵王郢發兵
距險其弟餘善與宗族謀曰王以擅發兵不請故天子
兵來誅漢兵衆彊即幸勝之後來益多滅國乃止今殺
王以謝天子天子罷兵固國完不聽乃力戰不勝即亡
入海皆曰善即鉞殺王鉞初江反使使奉其頭致大行大行
曰所為來者誅王王頭至不戰而殞利莫大焉廼以便
宜案兵告大司農軍而使使奉王頭馳報天子詔罷兩

將軍兵曰郢等首惡獨無諸孫繇君丑不與謀

繇邑號也繇音

搢與請曰豫

乃使中郎將立丑為粵繇王奉閩粵祭祀餘善

以殺郢威行國中民多屬竊自立為王繇王不能制上聞之為餘善不足復興師曰餘善首誅郢師得不勞因立餘善為東粵王與王繇並處至元鼎五年南粵反餘善上書請以卒八千從樓船擊呂嘉等兵至揭陽以海風波為解不行持兩端陰使南粵及漢破番禺樓船將軍僕上書願請兵擊東粵上以士卒勞倦不許罷兵令

諸校留屯豫章梅領待命明年秋餘善聞樓船請誅之

漢兵留境且往廼遂發兵距漢道號將軍騶力等為吞

漢將軍入白砂武林梅領殺漢三校尉是時漢使大司

農張成故山州侯齒將屯

齒城陽王恭子也舊封山州侯

不敢擊卻就

便處皆坐畏憚誅餘善刻武帝璽自立詐其民為妄言

上遣橫海將軍韓說出句章

說讀曰悅句章會稽之縣

浮海從東方

往樓船將軍僕出武林

楊僕也

中尉王溫舒出梅領粵侯

為戈船下瀨將軍出如邪白沙元封元年冬咸入東粵

東粵素發兵距險使徇北將軍守武林敗樓船將軍數

校尉殺長史樓船軍卒錢唐猿終古斬徇北將軍

錢唐會稽

縣也猿姓終古名也猿音袁

為語兒侯

越中也今吳南亭是語字或作節或作藥其音皆同

自兵未往故粵衍侯吳陽前在漢漢使歸諭餘善不聽

及橫海將軍至陽以其邑七百人反攻粵軍於漢陽及

故粵建成侯敖與繇王居股謀俱殺餘善以其衆降橫

海將軍封居股為東成侯萬戶封敖為開陵侯封陽為

卯石侯橫海將軍說為按道侯橫海校尉福為繚嬰侯

繚音遼 樊音於耕反

福者城陽王子故為海常侯坐法失爵從軍

亡功以宗室故侯及東粵將多軍

多軍名


漢兵至棄軍降

封為無錫侯故甌駱將左黃同斬西于王為下邳侯

音廊

郭於是天子曰東粵隲多阻閩粵悍數反覆詔軍吏皆

將其民徙江淮之間東粵地遂虛



通志卷一百九十四